



水經注釋

二十之三

六



內閣文庫	
番號	漢 9104
冊數	16 ( 6 )
函號	291 78



水經注釋卷二十

淺草文庫

仁和趙一清誠夫錄

漾水

丹水

漾水

出隴西氐道縣蟠冢山東至武都沮縣為漢水

常璩華陽國記曰漢水有二源東源出武都氐道縣漾


山為漾水禹貢導漾東流為漢是也西源出隴西西縣

蟠冢山會白水逕葭萌入漢始源曰沔按沔水出東狼

谷逕沮縣入漢漢中記曰蟠冢以東水皆東流蟠冢以

西水皆西流即其地勢源流所歸故俗以蟠冢為分水

嶺即此推沔水無西入之理劉澄之云有水從河陽縣



一清按漢書高帝紀師古曰阿陽天水之縣也今流俗  
 書本或作河陽者非也章懷後漢書注亦云然則寫阿  
 陽為河陽其來舊矣南至梓潼漢壽入大穴暗通罍山郭景純亦  
 言是矣罍山穴小本不容水水成大澤而流與漢合庾  
 仲邕又言漢水自武遂川南入蔓葛谷越野牛逕至開  
 城合西漢水故諸言漢者多言西漢水至葭萌入漢又  
 曰始源曰沔是以經云漾水出氐道縣東至沮縣為漢  
 水東南至廣魏白水診其泐注似與三說相符而未極  
 西漢之源矣然東西兩川俱受沔漢之名者義或在茲  
 矣班固地理志司馬彪袁山松郡國志竝言漢有二源  
 東出氐道西出西縣之嶓冢山闕駟云漢或為漾漾水

出崑崙西北隅至氐道重源顯發而為漾水又言隴西  
 西縣嶓冢山在西西漢水所出南入廣魏白水又云漾  
 水出源道東至武都入漢許慎呂忱竝言漾水出隴西  
 源道東至武都為漢水不言氐道然源道在冀之西北  
 又隔諸川無水南入疑出源道之為謬矣又云漢漾也  
 東為滄浪水山海經曰嶓冢之山漢水出焉而東南流  
 注于沔然東西兩川俱出嶓冢而同為漢水者也孔安  
 國曰泉始出為漾其猶濛耳而常璩專為漾山漾水當  
 是作者附而為山水之殊目矣余按山海經漾水出崑  
 崙西北隅而南流注于醜塗之水穆天子傳曰天子自

春山西征至于赤烏氏己卯北征庚辰濟于洋水辛巳  
 入于曹奴曹奴之人戲觴天子于洋水之上乃獻良馬  
 九百牛羊七千天子使逢固受之天子乃賜之黃金之  
 鹿戲乃膜拜而受余以太和中從高祖北巡狄人猶有  
 此獻雖古今世殊而所貢不異然川流隱伏卒難詳照  
 地理潛閼變通無方復不可全言闕氏之非也何氏曰  
 洋音詳不可竟指為  
 漾以證闕駟之說雖津流派別枝渠勢懸原始要終  
 潛流或一故俱受漢漾之名納方土之稱是其有漢川  
 漢陽廣漢漢壽之號或因其始或據其終縱異名互見  
 猶為漢漾矣川其目殊或亦在斯今西縣嶓冢山西漢

水所導也然微涓細注若通羣歷津注而已西流與馬  
 池水合水出上邽西南六十餘里謂之龍淵水言神馬  
 出水事同涂吾來淵之異故因名焉開山圖曰隴西神  
 馬山有淵池龍馬所生即是水也其水西流謂之馬池  
 川又西流入西漢水西漢水又西南流左得蘭渠溪水  
 次西有山黎谷水次西有鐵谷水次西有石耽谷水次  
 西有南谷水竝出南山揚湍北注右得高望谷水次西  
 得西溪水次西得黃花谷水咸出北山飛波南入西漢  
 水又西南資水注之水北出資川導源四壑南至資峽  
 總為一水出峽西南流注西漢水西漢水又西南得峽

石水口水出苑亭西草黑谷三溪西南至峽石口合爲  
一瀆東南流屈而南注西漢水西漢水又西南合楊廉  
川水水出西谷衆川瀉流合成一川東南流逕西縣故  
城北秦莊公伐西戎破之周宣王與其大駱犬邱之地  
爲西垂大夫亦西垂宮也王莽之西治矣建武八年世  
祖至河陽竇融等悉會天水震動隗囂將妻子奔西城  
從楊廣廣死囂愁窮城守時潁川賊起車駕東歸畱吳  
漢岑彭圍囂岑等壅西谷水以縑幔盛土爲隄灌城城  
未沒丈餘水穿壅不行地中數丈涌出故城不壞王元  
請蜀救至漢等退還上邽但廣廉字相狀後人因以人

名名之故習譌爲楊廉也置楊廉縣焉又東南流右會  
茅川水水出西南戎溪東北流逕戎邱城南吳漢之圍  
西城王捷登城向漢軍曰爲隗王城守者皆必死無二  
心願諸將亟罷請自殺以明之遂刎頸而死又東北流  
注西谷水亂流東南入于西漢水西漢水又西南逕始  
昌峽直始昌縣故城西晉書地道記曰天水始昌縣故  
西城也亦曰清崖峽西漢水又西南逕宕備戍南左則  
宕備水自東南西北注之右則鹽官水南入焉水北有  
鹽官在幡冢西五十許里相承營煮不輟味與海鹽同  
故地理志云西縣有鹽官是也其水東南逕宕備戍西

東南入漢水漢水又西南合左谷水水出南山窮溪北注漢水又西南蘭臯水出于西北五交谷東南歷祁山軍東南入漢水漢水又西南逕祁山軍南雞水南出雞谷北逕水南縣西北流注于漢漢水又西建安川水入焉其水導源建威西北山白石戍東南二源合注東逕建威城南又東與蘭坑水會水出西南近溪東北逕蘭坑城西東北流注建安水建安水又東逕蘭坑城北建安城南其地故西縣之歷城也楊定自隴右徙治歷城卽此處也去仇池一百二十里後改爲建安城其水又東合錯水水出錯水戍東南而東北入建安水建安水

又東北有雉尾谷水又東北有太谷水又北有小祁山水竝出東溪揚波西注又北左會胡谷水水西出胡谷東逕金盤歷城二軍北軍在水南層山上其水又東注建安水建安水又東北逕塞峽元嘉十九年宋太祖遣龍驤將軍裴方明伐楊難當難當將妻子北奔安西參軍魯尚期追出塞峽卽是峽矣左山側有石穴洞人言潛通下辨所未詳也其水出峽西北流注漢水漢水北連山秀舉羅峯競峙祁山在岵冢之西七十許里山上有城極爲巖固昔諸葛亮攻祁山卽斯城也漢水逕其城南三里有亮故壘壘之左右猶豐茂宿草蓋亮所

植也在上邽西南二百四十里開山圖曰漢陽西南有  
祁山蹊徑逶迤山高巖嶮九州之名岨天下之奇峻今  
此山于衆阜之中亦非爲傑矣漢水又西南與甲谷水  
合水出西南甲谷東北流注漢水漢水又西逕南岬北  
岬之中上下有二城相對左右墳隴低昂亘山被阜古  
語云南岬北岬萬有餘家諸葛亮表言祁山去沮縣五  
百里有民萬戶矚其邱墟信爲殷矣漢水西南逕武植  
戍南武植戍水發北山二源奇發合于安民戍南又南  
逕武植戍西而西南流注于漢水漢水又西南逕平夷  
戍南又西南夷水注之水出北山南逕其戍西南入漢

水漢水又西逕蘭倉城南又南右會兩溪俱出西山東  
流注于漢水張華博物志云溫水出烏鼠山下注漢水  
疑是此水而非所詳也漢水又南入嘉陵道而爲嘉陵  
水世俗名之爲階陵水非也漢水又東南得北谷水又  
東南得武階水又東南得倉谷水右三水竝出西溪東  
流注漢水漢水又東南逕瞿堆西又屈逕瞿堆南絕壁  
峭峙孤嶮雲高望之形若覆壺其高二十餘里羊腸蟠  
道三十六迴開山圖謂之仇夷所謂積石嵯峨欽岑隱  
阿者也上有平田百頃煮土成鹽因以百頃爲號山上  
豐水泉所謂清泉湧沸潤氣上流者也漢武帝元鼎六

年開以為武都郡天池大澤在西故以都為目矣王莽  
 更名樂平郡縣曰循虜常璩范曄云郡居河池一名仇  
 池池方百頃即指此也左右悉白馬氏矣漢獻帝建安  
 中有天水氏楊騰者世居隴右為氏太師子駒勇健多  
 計徙居仇池魏拜為百頃氏王漢水又東合洛谷水水  
 有二源同注一壑於神蛇戍西左右山溪多五色蛇性  
 馴良不為物毒洛谷水又南逕虎馘戍東又南逕仇池  
 郡西瞿堆東西南入漢水漢水又東合洛漢水水北發  
 洛谷南逕威武戍南又西南與龍門水合水出西北龍  
 門谷東流與橫水會東北窮溪即水源也又南逕龍門

戍東又東南入洛漢水又東南逕上祿縣故城西修源  
 濬導逕引北溪南總兩川單流納漢漢水又東南逕濁  
 水城南又東南會平洛水水出武階東北四十五里更  
 馳南溪導源東北流山側有甘泉涌波飛清下注平洛  
 水又逕甘泉戍南又東逕平洛戍南一清按漢志武都  
 郡有平樂道即平  
洛戍也道元時  
 其縣已廢省矣又東入漢謂之會口漢水東南逕修城  
 道南與修水合水總二源東北合漢漢水又東南於槃  
 頭郡南與濁水合水出濁城北東流與丁令溪水會其  
 水北出丁令谷南逕武街城西東南入濁水濁水又東  
 逕武街城南故下辨縣治也李倉李稚以氏王楊敵堅



妻死葬陰平襲武街為氏所殺於此矣一清按華陽國志十六國春秋

李倉作李玲又氏王楊難敵堅頭乃兄弟二人此云楊敵堅蓋誤文也今廣業郡治濁水

又東宏休水注之水北出溪南逕武街城東而南流注

於濁水濁水又東逕白石縣南續漢書曰虞詡為武都

太守下辨東三十餘里有峽峽中有泉生大石障塞水

流春夏輒潰溢敗壞城郭詡使燒石以醋灌之石皆碎

裂因鑄去焉遂無泛溢之害濁水即白水之異名也濁

水又東南渥陽水北出渥谷南逕白石縣東而南入濁

水濁水又東南與仇鳩水合水發鳩溪南逕河池縣故

城西王莽之樂平亭也其水西南流注濁水濁水又東

南與河池水合水出河池北谷南逕河池戍東西南入

濁水濁水東南兩當水注之水出陳倉縣之大散嶺西

南流入故道川謂之故道水西南逕故道城東魏征仇

池築以置戍與馬鞍山水合水東出馬鞍山歷谷西流

至故道城東西入故道水西南流北川水注之水出北

洛櫛山南南流逕唐倉城下南至困冢川入故道水故

道水又西南歷廣香交合廣香川水水出南田縣利喬

山清按郡國志劉昭補注引秦州記曰上邽縣北有

楊樹大數十圍百姓祀之朱氏南流至廣香川謂之廣

香川水一清按蕭齊建元元年葭萌戍主楊廣又南注

水經注釋 卷二十 八 東潛趙氏定本

故道水謂之廣香交故道水又西南入秦岡山尙婆水  
 注之山高入雲遠望增狀若嶺紆曦軒峯枉月駕矣懸  
 崖之側列壁之上有神象若圖指狀婦人之容其形上  
 赤下白世名之曰聖女神至於福應愆違方俗是祈水  
 源北出利喬山南逕尙婆川謂之尙婆水一清按元和郡縣志云尙婆水本名石磐水水多磐石因以為名俗語音訛故云尙婆歷兩當縣之尙婆城南  
 魏故道郡治也西南至秦岡山入故道水故道水又右  
 合黃盧山水水出西北天水郡黃盧山腹歷谷南流交  
 注故道水故道水南入東益州之廣業郡界與沮水枝  
 津合謂之兩當溪水上承武都沮縣之沮水瀆西南流

注於兩當溪虞詡為郡漕穀布在沮從沮縣至下辨山  
 道嶮絕水中多石舟車不通驢馬負運僦五致一詡乃  
 於沮受僦直約自致之即將吏民按行皆燒石櫛木開  
 漕船道水運通利歲省萬計以其僦廩與吏士年四十  
 餘萬也又西南注于濁水濁水南逕槃頭郡東而南合  
 鳳溪水水上承濁水於廣業郡南逕鳳溪中有二石雙  
 高其形若闕漢世有鳳凰止焉故謂之鳳凰臺北去郡  
 三里水出臺下東南流左注濁水濁水又南注漢水漢  
 水又東南歷漢曲逕挾崖與挾崖水合水西出擔潭交  
 東流入漢水漢水又東逕武興城南又東南與北谷水

合水出武興東北而西南逕武興城北謂之北谷水南轉逕其城東而南與一水合水出東溪西流注北谷水又南流注漢水漢水又西南逕關城北除水出西北除溪東南流入于漢漢水又西南逕通谷通谷水出東北通溪上承漾水西南流為西漢水漢水又西南寒水注之水東出寒川西流入漢漢水又西逕石亭戍廣平水西出百頃川東南流注漢又有平阿水出東山西流注漢水漢水又逕晉壽城西而南合漢壽水水源出東山西逕東晉壽故城南而西南入于漢水也

又東南至廣魏一清按此篇及羌水涪水梓潼水經文俱作廣魏胡氏曰廣魏者故廣漢也蓋曹氏

改名漢後人續經此其一證何氏曰亭林云魏書崔浩傳浩工書人多託寫急就章必稱馮代疆以示不敢犯國史于馮代疆下注曰疑按急就篇有馮漢疆魏初因號曰代故改漢疆為代疆酈道元以廣漢為廣魏即此例也據此則非由曹氏改名是又一義也白水縣西又東南至葭萌縣東北與羌水合

白水西北出於臨洮縣西南西傾山一清按漢志廣漢郡甸氏道白水出

微外東至葭萌入漢過郡一行九百五十里水色白濁東南流與黑水合水

出羌中西南逕黑水城西又西南入白水白水又東逕

洛和城南洛和水西南出和溪東北流逕南黑水城西

而北注白水白水又東南逕鄧至城南又東南與大夷

祝水合水出夷祝城西南而窮溪北注夷水又東北合

羊洪水出東南羊溪西北逕夷祝城東又西北流屈而東北注于夷水夷水又東北入白水白水又東與安昌水會水源發衛大西溪東南逕鄧至安昌郡南又東南合無累水無累水出東北近溪西南入安昌水安昌水又東南入白水白水又東南入陰平得東維水水出西北維谷東南逕維城西東南入白水白水又東南逕陰平道故城南王莽更名摧虜矣即廣漢之北部也廣漢屬國都尉治漢安帝永初三年分廣漢蠻夷置有白馬水出長松縣西南白馬溪東北逕長松縣北

一清按隋書地理志

武都郡長松縣西魏置初曰建昌開皇十八年改曰而長松此昔人所謂未必不間及隋唐者也吁可怪已

東北注白水白水又東逕陰平大城北蓋其渠帥自故城徙居也白水又東偃溪水出西南偃溪東北流逕偃城西而東北流入白水白水又東逕偃城北又東北逕橋頭昔姜維之將還蜀也雒州刺史諸葛緒邀之於此後期不及故維得保劍閣而鍾會不能入也白水又與羌水合自下羌水又得其通稱矣白水又東逕郭公城南昔郭淮之攻廖化于陰平也築之故因名焉白水又東雒川水出西南雒溪東北注白水白水又東合空冷水傍溪西南窮谷即川源也白水又東南與南五部水會水有二源西源出五部溪東南流東源出郎谷西南合

注白水白水又東南逕建陽郡東一清按兩漢晉宋後魏地志俱無建陽郡之名名勝志引此文作建昌郡則西魏析陰平所置也以地望而言宇文曾置建昌縣後改曰長松建昌疑即上長松之舊稱然皆在孝昌以後道元何由得舉之乎或曰此後魏梁州之華陽郡也建陽疑華陽之訛未詳是而非北與一水合二源同注共成一溪西南流入於白水白水又東南逕白水縣故城東即白水郡治也經云漢水出其西非也白水又東南與西谷水相得水出西溪東流逕白水城南東南入白水白水又南左會東流水東入極溪即水源也白水又南逕武興城東又東南左得刺稽水口溪東北出便水源矣白水又東南清水左注之庾仲雖曰清水自祁山東合白水斯為孟浪也

水出於平武郡東北

一清按隋書地理志云平武郡西魏置

矚累互下南

逕平武城東屈逕其城南又西歷平洛郡東南屈而南

逕南陽僑郡東北又東南逕新巴縣東北又東南逕始

平僑郡南又東南逕小劍戍北西去大劍三十里連山

絕嶮飛閣通衢故謂之劍閣也張載銘曰一人守嶮萬

夫趨趨信然故李特至劍閣而歎曰劉氏有如此地而

面縛於人豈不奴才也小劍水西南出劍谷東北流逕

其戍下入清水清水又東南注白水白水又東南逕吐

費城南即西晉壽之東北也東南流注漢水西晉壽即

蜀王弟葭萌所封為葭侯邑故遂名城為葭萌矣劉備

改曰漢壽太康中又曰晉壽水有津關

一清按通鑑注引水經注云白

水東南流至葭萌縣謂之葭萌水水有津關所謂白水關今本似有脫文

段元章善風角弟子歸元章封簡藥授之曰路有急難開之生到葭萌從

者與津吏諍打傷開簡得書言其破頭者可以此藥裹

之生乃歎服還卒業焉亦廉叔度抱父柩自沈處也

又東南過巴郡閬中縣

巴西郡治也劉璋之分三巴此其一焉闕駟曰強水出

陰平西北強山一曰強川姜維之還也鄧艾遣天水太

守王頌敗之于強川卽是水也其水東北逕武都陰平

梓潼南安入漢水漢水又東南逕津渠戍東又南逕閬

中縣東閬水出閬陽縣而東逕其縣南又東注漢水昔

劉璋之攻霍峻于葭萌也自此水上張達范彊害張飛

於此縣漢水又東南得東水口水出巴嶺南歷獠中謂

之東遊水李壽之時獠自牂柯北入所在諸部布滿山

谷其水西南逕宋熙郡東又東南逕始平城東又東南

逕巴西郡東又東入漢水漢水又東與濩溪水合水出

獠中世亦謂之爲清水也東南流注漢水漢水又東南

逕宕渠縣東又東南合宕渠水西北出南鄭縣巴嶺與

槃余水同源派注南流謂之北水東南流與難江水合

水出東北巴山

一清按寰宇記集州難江縣引此注作小巴山云小巴嶺在縣東

西南

注之又東南流逕宕渠縣謂之宕渠水又東南入于漢

又東南入漢州江津縣東南入于江也一清按此條經文誤也尚書古文疏證曰

胡肫明日水經魏晉人續成自後間有附益亦未必不及

隋唐頃讀至漾水未有漢州江津縣今屬重慶府本州治巴

筆乎漢乃渝字之譌渝州江津縣今屬重慶府本州治巴

縣地西魏分置江陽縣隋改曰江津巴縣在東江津在西

漢水不得過江津也再三推尋不知其故及讀至羌水篇

云出羌中東南至廣魏白水縣與漢水合又東南至巴郡

閬中縣又南至墊江東南入于江憬然悟曰羌水合白水

東南至白水縣與漢水合蓋漢水入江之道即羌水入江

之道自閬中以下經文與此字字相同今本之誤蓋由東

南入于江之上字有空缺妄庸人率意填補耳非續經也

墊江今合州漢水流逕州東涪水自州西南來注之正酈

氏所云涪水注之庾仲雍所謂涪內水者也若作渝州江

津縣則涪漢之合遠在上流經注齟齬矣東南入漢州江

津七字當改作南至墊江四字入字尤非水經敘次水所

逕過之郡之縣未有入字者潛邱以經文有空缺為妄

庸人所填寫非魏晉以後續經真卓識也東樵既面與論

證及作錐指據漢書地理志隴西西縣下云禹貢嶓冢山

西漢水所出南入廣魏白水東南至江州入江之文更定

作又東南逕江州縣東南入于江而不從閬說江州江津

俱屬巴郡第江州漢縣而江津則隋置耳且漢州唐垂拱

二年始立此名明是不學者妄為填寫潛邱乃改作渝州

以實其為隋唐人之筆何至曲為之說如此耶江水篇云

涪水注之庾仲雍所謂涪內水者也

既一清按漢水班志

分水經又有漾河異篇之日後之言禹貢者山川迄無

定位莫能折衷黃文叔尚書說曰漢有沔漾之名皆東

漢水也地理志西漢水出西縣嶓冢山南入廣漢白水

蓋潛漢也經不著其所自古皆以為東西兩漢俱出

嶓冢則或然矣而西漢固無沔漾之名漢志漾水出隴

西氏道至武都為漢武都東漢水受氏道水一名沔是

則沔漾俱為東漢也獨氏道武都脈絡不通川渠阻隔

武都受漾為不可據而桑欽遂徙氏道漾水為西漢之


文杜佑通典秦州上邽縣嶓冢山西漢水所出經嘉陵曰嘉陵江經閬中曰閬中江漢中金牛縣嶓冢山禹貢漾水至此為漢水亦曰沔水其說為可據常璩華陽國志漾水出嶓冢山嶓冢山尋求不得其處漢志沮縣沮水出東狼谷中水經推為沔水之源是正姑存之要與孔傳不同矣胡身之通鑑注云據禹貢則漢水源于漾據水經則漾會于涪沔入于江所出異源所入異派據班志則漾出氏道至武都為漢水而東漢受氏道水通謂之沔過江夏而入于江則漾河似合為一矣然又言沮水出沮縣南至沙羨入江與水經所謂沔水即沮水說似不合而實合也夫道元之曲護經文誠如黃說然其言嶓冢有二東西兩漢異源同流是豈竟無別白耶若程泰之禹貢論力排水經反覆于東出西南其向曉曉不置近世胡融明作禹貢雖指首列導漾圖又作東西二源圖可謂詳且備矣然不能于班志原文一加審諦即道元之注亦未之深察故立言之旨猶有所蔽今略舉其書曰按後魏地形志華陽郡嶓冢縣有嶓冢山漢水出焉唐六典山南道名山曰嶓冢縣有嶓冢山漢水北西漢中府沔縣西南四十里西漢中府沔縣西南四十里西漢中府沔縣西南四十里

在漢中郡沔陽縣界後魏正始中析沔陽置嶓冢縣屬華陽郡故地形志云其縣有嶓冢山隋省沔陽入嶓冢屬梁州大業初改置西縣故隋志云西縣有嶓冢山唐武德二年分利州綿谷縣之通谷鎮置金牛縣而山入其境故括地志云嶓冢山在金牛縣東二十八里通典云金牛縣有三泉故寰宇記云嶓冢山在三泉縣寶歷初道二年升三泉縣為大安軍紹興三年改建軍于西縣界復置三泉縣隸軍故輿地紀勝引宋朝郡縣志云今之言漢水以西縣之嶓冢山為源後又省三泉入軍故地理通釋云嶓冢山在大安軍西元降軍為縣故大一統志云漢水源出大安縣嶓冢山明初以其地改置沔縣又於縣西南置寧羌衛成化二十二年即衛置州而山入其境故漢中府志云嶓冢山在寧羌州北九十里蓋此山本在漢沔陽縣界西南接葭萌自後魏以來言山之所在曰嶓冢曰西縣曰金牛曰三泉曰大安曰寧羌地名六變而山則一皆在古梁州之域其為禹貢之嶓冢無疑也又云嶓冢山孔傳不言所在之郡縣而正義引地理志以實之曰隴西郡西縣嶓冢山漢水所出夫此水即嘉陵水之上源非禹貢之所謂嶓冢導漾



東流為漢者也而班固以西縣之嶓冢為禹貢之嶓冢  
 謬矣自是以後言嶓冢者率依班氏自後魏正始中析  
 沔陽地置嶓冢縣以表其山而名始著酈道元卒于孝  
 昌二年上距正始置縣之時凡二十餘歲本朝典故生  
 所親見而注水經不言豈事在成書之後不及追改抑  
 亦因其晚出而疑之乎然漾水注引漢中記曰嶓冢以  
 東水皆東流嶓冢以西水皆西流故俗以嶓冢為分水  
 嶺作者亦似知班志之謬而以禹貢嶓冢為當在漢中  
 也者不然于漢中記奚為詳及隴西之山邪穎達豈未  
 之考乎然班志雖以西縣嶓冢為禹貢之山而養水自  
 繫氏道之下不言出某山自水經云漾水出氏道縣嶓  
 冢山而氏道亦有嶓冢矣常璩華陽國志云東源出武  
 都氏道縣嶓山為漾水而氏道之嶓冢且存漾山之目  
 矣郭璞注山海經云嶓冢今在武都氏道縣南酈道元  
 注水經云東西兩源俱出嶓冢而為漢水則似一山  
 跨二縣之境而在西縣者為西源在氏道者為東源矣  
 輾轉迷惑愈久而西縣者為西源在氏道者為東源矣  
 故城在今秦州西南氏道不知所在蓋自晉永嘉之亂  
 隴西沒于氏羌郡縣荒廢常璩郭璞皆云氏道屬武都  
 而晉志武都郡無之則其縣之不可考久矣要之二縣

在隴西皆古雍州域也而禹貢嶓冢乃梁州之山不應  
 闕入雍城故惟魏收所言為得其實又云漢志隴西西  
 縣下云禹貢嶓冢山行西漢水所出南入廣漢白水東  
 至江州入江過郡四行二千七百六十里此與氏道之  
 出隴西氏道縣嶓冢山東至武都沮縣為漢水此不過  
 依漢志氏道一條以立文惟加嶓冢沮縣為漢水此不  
 所謂漢水即東漢也亦與西縣之西漢全無交涉首尾  
 橫決必魏晉間人所續也尋其意旨蓋以氏道水南合  
 濁水兩當溪歷槃頭郡東而南為西漢水也故酈注以  
 為東西兩川俱出嶓冢而通要皆自東入西非自西入東  
 漾沮雖有枝津與西漢通要皆自東入西非自西入東  
 也蓋嶓冢巨絕東西俗謂之分水嶺地勢東高而西下  
 故西漢水自略陽縣南入寧羌州界即折而西南避高  
 就下其性則然豈有東入之理澄之所謂即禹貢之潛  
 仲邕所言即通谷水也二水皆東漢之枝津西流入西  
 漢水而說者乃謂西漢水至葭萌入漢顛倒之矣今嶺  
 東漾沮枝津皆入西漢嶺西谿澗之水亦皆入西漢川  
 流去來有目者盡能驗之其可謂古而非今乎又曰水  
 經依漢志以為言漢志以沮水枝津上承氏道水下為



東漢水氏道雖未詳其處所以地望度之當在西縣之東河池之西上邽之南下辨之北濁水所受有丁令溪水宏休水溼陽水皆出其北蓋自氏道來也其中或有漢志所謂養水者但今無可考耳然沮水枝津上承沮瀆自東入西非自西入東也昔之觀水作記者不察地勢之高下不辨川流之去來遂以為氏道養水合濁水兩當溪由枝津以達沮沔是為東漢之源而不知其非也班固因之故有此誤水經于武都下加沮縣二字蓋亦以氏道水通沮水為東漢之源也然漢志不言養水出何山而水經復附會之曰岷山則氏道亦有岷山矣常璩知其非是故又因水以名其山曰漾山而為之殊目要之氏道水所出別是一山非岷山也又云陸游曰嘗登岷山有泉涓涓出山間是為漢水之源務觀入蜀塗歷金牛目驗得之涓涓細流安國傳所謂泉始出山為漾水也新城王尚書士禎撰蜀道驛程記其言岷漢最為詳覈記曰出岷縣西門曲折行亂山中沔水流逕其中略如棧道但山庫無林木沔流舒緩不及褒水湍悍耳西涉沮水抵大安驛狹者才二三尺沙石磷磷深不沒踝自大安西南亂山益稠至金牛驛北望見岷山峩然雲表一小水自西東流即所謂岷山導

漾者大金牛驛西三里稍南入五丁峽水東流為沔其流始大金牛驛西三里稍南入五丁峽一名金牛峽在口懸崖萬仞陰風颯然水自峽中噴薄而出寧羗州在亂山中無城堞本沔縣羊鹿坪地明洪武中以山寇作亂置寧羗衛于此成化中即衛建州治自州行十里渡水過百牢關關下有分水嶺嶺東水皆北流五丁峽水北合漾水入沔嶺西水皆南流迤七盤關龍洞合嘉陵水為川江常璩言沔出岷山有二一在天水為西漢明與導漾之文相悖按通典岷山在秦州源出岷山一在漢中金牛雍大記云西漢水在秦州源出岷山一在漢與馬池水合此乃上邽之岷水在秦州源出岷山一在漢縣岷山東流入秦州此乃金牛之岷水在秦州源出岷山一在漢二漢源流各自了然漾之與沔本為一流與隴西之岷家都無交涉常氏之誤可辨而自明矣又云禹貢以岷家繫梁州而漢志岷山在雍域之隴西一誤也禹貢云岷道二誤也禹貢之潛乃岷水枝津西出為西漢水而出氏道西漢水出西縣之潛乃岷水枝津西出為西漢水而漢志西漢水出西縣之潛乃岷水枝津西出為西漢水出何山而水經云出氏道縣岷山是氏道亦有岷山

四誤也漾者東漢之源而續水經者以西漢水接漾水  
 為一川五誤也漾河枝津皆自東入西而酈注從舊說  
 云西漢水至葭萌入漢六誤也川流地上離合灼然可  
 見而酈注惑闕駟之說以為原始要終潛流或一故東  
 西俱受漢漾之名七誤也羣言殺亂學者靡所折衷今  
 說漢水當排棄諸家專主禹貢以沮沔為漢之別源以  
 西漢為漾之枝津而氏道水則存而不論是亦理亂絲  
 解連環之術也東樵之言剖判辨析幾無贖義而鄙意  
 則猶有未安者水經以漾水冒于西漢之上而東漢之  
 源僅以沮沔枝津當之是其大錯而以爲誤始班志竊  
 謂不然班志隴西縣下云禹貢之漢水于氏道下云禹  
 貢猶恐人誤以西漢水即禹貢之漢水于氏道下云禹  
 養水所出至武都為漢武都下云東漢水受氏道水一  
 名沔過江夏謂之夏水入江漢中沔陽下云沔水出武  
 都東南入江氏道水即養水今人既不知氏道之所在  
 又烏能必養水之不出于氏道乎夫河源渺茫隔在異  
 域尙可追尋况氏道雖陷氏羌當漢盛時猶隸版籍班  
 氏之記載非盡無稽也由氏道而沔而漢以入于江源  
 流脈絡條貫分明又武都沮縣下云沮水出東狼谷南  
 至沙羨入江夫沮即沔也狼谷即嶓冢也隴西之嶓冢

西漢之所出氏道之養水乃大禹之所導班志明言之  
 而猶歸過于班氏班氏不受也道元知水經漾水之誤  
 也于是欲于禹貢嶓冢導漾之外別求一漾水以彌縫  
 其失而卒不可得也乃東樵則以魏書地形志華陽郡  
 嶓冢縣有嶓冢山漢水出焉執此文以詆班酈夫禹貢  
 漾水出自漢中之嶓冢前此山海經則以爲酈禹山水  
 經則以爲東狼谷至後魏乃因漾水在是所指所出之山  
 而名之曰嶓冢雖有經記可憑然在漢時嶓冢自在隴  
 西漾水自出氏道豈能逆料五百餘年以後之所謂  
 而強爲附和哉道元于沔水東南流注漢曰沮口下云  
 所謂沔漢者也尙書禹貢嶓冢導漾東南流為漢山海經  
 所謂酈禹山也補正之功不淺猶云成書未及追改使  
 酈亭負此長冤而復據陸王征途所記以爲目驗得之  
 夫二子即博學嗜古其所涉歷按遽乘傳于川脈之遙  
 修山礫之綿阻不過望而測之世代悠邈荆蕪沒而  
 率然斷以氏道水之弱也禹貢梁州云嶓冢既藝導山  
 夫嶓冢一山誠非小弱也禹貢梁州云嶓冢既藝導山  
 云導嶓冢至于荆山岷山之陽至于衡山導水云嶓冢  
 導漾東流為漢岷山導江東別為沔兩山比較書法重  
 輕嶓之與岷未云多讓東樵亦云觀漢志云岷山在徼

外則固不可以前氏一縣限之曾與岷之知岷山脈之長而不  
 一縣限之乎程克齋春秋分記曰梁州左山皆曰岷右  
 山皆曰岷出岷者皆曰岷漢水東漢水之殊蓋自秦州  
 水中水外水之異漢有西漢水東漢水之殊蓋自秦州  
 東望則為雍之岷家自寧羌州西望則為梁之岷家禹  
 貢表之于雍而不繫之于雍則以導漾之功致力於梁  
 而不于雍耳真通儒之言也朝廷欽頌書經傳說彙  
 纂云岷家有二一在陝西漢中府寧羌州西北九十里東  
 漢水所出相去三四百里支派隱然聯屬所謂隴東之  
 二水皆岷家也何其明白易曉與故謂東漢水不出自隴  
 山之岷家可謂隴西之岷家必非禹貢之岷家不可謂  
 禹貢之漾水出于寧羌州之岷家可謂禹貢之岷家必  
 僅在寧羌州則不可也爾雅音義曰有水從漢中沔陽  
 縣南流至梓潼漢壽入大穴中通峒山下西南潛出一  
 名沔舊俗云即禹貢潛也然潛水實受西漢水鄭康成  
 所謂漢別為潛大禹自導漢疏通即為西漢水也經云  
 岷岷既藝沱潛既導繫沱潛于岷岷之下烏知禹貢之  
 言漢不兼東西二源乎荆州貢道云浮于江沱潛漢足

明四水之相通矣漢人說經各有師承康成大儒必不  
 妄道三卿為眾吾舍鄭公將何從乎同時閻百詩最不  
 信古文力攻以為偽書并謂孔安國傳出自東晉梅頤  
 手然其說岷家東西兩漢水同源如樵所云者其尚書古文疏證曰  
 志以隴西西縣之岷家為非禹貢之所有氏道之養水  
 為非大禹之所導如樵所云者其尚書古文疏證曰  
 東西兩漢水異源同流按水經以漾水出隴西氏道縣  
 岷家山東至武都沮縣為漢水者為西漢水也  
 故下文云又東南至廣魏與白水合又東南至葭萌縣  
 與羌水合酈氏注云今西縣岷家山西漢水所導也此  
 是遙承班固地理志來不見有禹貢字是道元以班志  
 西縣禹貢字為非而不顯駁之古人文多隱約水經以  
 沔水出武都沮縣東南流注漢酈氏注特標出尚書曰岷  
 涇沮水出武都東南流注漢酈氏注特標出尚書曰岷  
 導漾東流為漢以大禹當日所導實在于此亡友顧景  
 范謂水經不詳漢水所自出沔水沮水特入漢之小水  
 耳反詳志其源忘卻出今寧羌州者何與其說極是余  
 請兩言以剖別之曰酈道元謂東西兩川俱出岷家猶  
 言各出岷家云爾而為漢水猶言同名漢水云爾又  
 曰按孔安國傳曰泉始出山為漾水東南流為沔水至

漢中東流為漢水遙與前逾于河傳漢上曰河相照應  
 補出此句最佳余欲以班志沮縣下注沮水出東狼谷  
 南至沙羨南入江取武都縣下注一名河過江夏謂之  
 夏水十字補入東狼谷之下南至沙羨之上漢水原委  
 方備又曰常璩稱漢有二源以東源為即禹貢之漾水  
 極是與水經各一書非承水經而為文者獨道元于水  
 經以西漢水為漾水曲徇其說寧取山海經闕氏荒誕  
 之說曰川流有潛通之理故漾漢互稱至敘次通谷水  
 曰上承漾水西南流為漢水漾水之稱仍屬東漢酈氏  
 微意居然可睹矣潛邱之言如此是故山連麓而水異  
 源山連麓故上邽之蟠冢與金牛之蟠冢皆為禹貢之  
 山水異源故西漢水為大禹所疏通則已著于康成之  
 說豈後人所得而妄加之哉說者猶以班志隴西縣  
 禹貢蟠冢為疑夫夫雖善辨卒不能滅秦州蟠冢之名  
 則何如取隴東之山皆蟠冢  
 一語深思而紬繹之也哉

丹水出京兆上洛縣西北冢嶺山

一名高豬山也丹水東南流與清池水合水源東北出

清池山西南流入于丹水

東南過其縣南

縣故屬京兆晉分為郡地道記曰郡在洛上故以為名  
 竹書紀年晉烈公三年楚人伐我南鄙至于上洛楚水  
 注之楚水源出上洛縣西南楚山昔四皓隱于楚山即  
 此山也其水兩源合舍于四皓廟東又東逕高車嶺南  
 翼帶衆流北轉入丹水嶺上有四皓廟丹水自倉野又  
 東歷兔和山即春秋所謂左師軍于兔和右師軍于倉  
 野者也

又東南過商縣南又東南至于丹水縣入于洵

契始封商魯連子曰在太華之陽皇甫謐闕駟竝以為  
 上洛商縣也殷商之名起于此矣丹水自商縣東南流  
 注歷少習出武關應劭曰秦之南關也通南陽郡春秋  
 左傳哀公四年楚左司馬使謂陰地之命大夫士蔑曰  
 晉楚之盟好惡同之不然將通于少習以聽命者也京  
 相璠曰楚通上洛阨道也漢祖下浙酈攻武關文穎曰  
 武關在浙縣西一百七十里宏農界也丹水又東南流  
 入白口歷其戍下又東南浙水出浙縣西北宏農盧氏  
 縣大蒿山南流逕修陽縣故城北縣即浙之北鄉也又  
 東入浙縣流結成潭謂之龍淵清深神異耆舊傳云漢

祖入關逕觀是潭其下若有府舍焉事既非恆難以詳  
 矣其水又東逕其縣故城北蓋春秋之白羽也左傳昭  
 公十八年楚使王子勝遷許于浙是也郭仲產云相承  
 言此城漢高所築非也余按史記楚襄王元年秦出武  
 關斬衆五萬取浙一十五城漢祖入關亦言下浙酈非  
 無城之言修之則可矣浙水又歷其縣東王莽更名縣  
 為古亭也一清按漢志作君亭而南流入丹水縣注于丹水故丹  
 水會洵有浙口之稱丹水又東南逕一故城南名曰三  
 戶城昔漢祖入關王陵起兵丹水以歸漢祖此城疑陵  
 所築也丹水又逕丹水縣故城西南縣有密陽鄉古商

密之地昔楚申息之師所戍也春秋之三戶矣杜預曰縣北有三戶亭竹書紀年曰壬寅孫何侵楚入三戶郭者是也水出丹魚先夏至十日夜伺之魚浮水側赤光上照如火網而取之割其血以塗足可以步行水上長居淵中丹水東南流至其縣南黃水出北芬山黃谷南逕丹水縣南注于丹水黃水北有墨山山石悉黑績彩奮發黝焉若墨故謂之墨山今河南新安縣有石墨山斯其類也丹水南有丹崖山山悉赭壁霞舉若紅雲秀天二岫更爲殊觀矣丹水又南逕南鄉縣故城東北漢建安中割南陽右壤爲南鄉郡逮晉封宣帝孫暢爲順

陽王因立爲順陽郡而南鄉爲縣舊治鄴城永嘉中丹水浸沒至永和中徙治南鄉故城城南門外舊有郡社柏樹大三十圍蕭欣爲郡伐之言有大蛇從樹腹中墜下大數圍長三丈羣小蛇數十隨入南山聲如風雨伐樹之前見夢于欣欣不以厝意及伐之更少日果死丹水又東逕南鄉縣北興寧末太守王靡之改築今城城北半據在水中左右夾澗深長及春夏水漲望若孤洲矣城前有晉順陽太守丁穆碑郡民范甯立之丹水逕流兩縣之間歷於中之北所謂商於者也故張儀說楚絕齊許以商於之地六百里謂以此矣呂氏春秋曰堯





交西卽盧氏界也其水東北流逕太和城西又東流逕其城北左右深松列植筠柏交蔭尹公度之所棲神處也又東屆堯山西嶺下水流兩分一水東逕堯山南爲滢水也卽經所言滢水出堯山矣一水東北出爲汝水歷蒙柏谷左右岫壑爭深山阜競高夾水層松茂柏傾山蔭渚故世人以名也津流不已北歷長白沙口狐白谿水注之夾岸沙漲若雪因以取名其水南出狐白川北流注汝汝水又東北趣狼臯山者也

東南過其縣北

汝水自狼臯山東出峽謂之汝阨也東歷麻解城北故

鄭鄉城也謂之蠻中左傳所謂單浮餘圍蠻氏蠻氏潰者也杜預曰城在河南新城縣之東南伊洛之戎陸渾蠻氏城也俗以爲麻解城非也蓋蠻麻讀聲近故也汝水又逕周平城南京相璠曰霍陽山在周平城東南者也汝水又東與三屯谷水合水出南山北流逕石碣東柱側刊云河南界又有一碣題言洛陽南界碑柱相對旣無年月竟不知何代所表也其水又北流注於汝水汝水又東與廣成澤水合水出狼臯山北澤中安帝永初元年以廣成遊獵地假與貧民元初二年鄧太后臨朝鄧騭兄弟輔政世士以爲文德可興武功宜廢寢蒐

狩之禮息戰陣之法于時馬融以文武之道聖賢不墜  
 五材之用無或可廢作廣成頌云大漢之初基也揆厥  
 靈囿營于南郊右轡三塗左枕嵩嶽面據衡陰背基王  
 屋浸以波澆演以榮洛金山石林殷起乎其中神泉側  
 出丹水涅池怪石浮磬燿焜于其陂桓帝延熹元年校  
 獵廣成遂幸函谷關其水自澤東南流逕溫泉南與溫  
 泉水合溫水殷源揚波于川左泉上華宇連蔭茨薨交  
 拒方塘石沼錯落其間頤道者多歸之其水東南流注  
 廣成澤水澤水又東南入於汝水汝水又東得魯公水  
 口水上承陽人城東魯公陂城古梁之陽人聚也秦滅

東周徙其君于此陂水東南流合於澗水水出北山南  
 流注之又亂流注於汝水汝水之右有霍陽聚汝水逕  
 其北東合霍陽山水水出南山杜預曰河南梁縣有霍  
 山者也其水東北流逕霍陽聚東世謂之華浮城一清按章  
 懷後漢書注曰非也春秋左傳哀公四年楚侵梁及霍  
 俗謂之張侯城服虔曰梁霍周南鄙也建武二年世祖遣征虜將軍祭  
 遵攻蠻中山賊張滿時厭新柏華餘賊合攻得霍陽聚  
 即此一清按後漢書祭遵傳時新城蠻中山賊張滿屯  
結險隘為人害詔遵攻之而厭新柏華餘賊復與  
滿合遂攻得霍陽聚水又逕梁城西按春秋周小邑也  
道元抄變其詞耳于戰國為南梁矣故經云汝水逕其縣北俗謂之治城

非也以北有注城故也今置治城縣治霍陽山水又東北流注於汝水汝水又右合三里水水北出梁縣西北而東南流逕其縣故城西故愚狐聚也地理志云秦滅西周徙其君于此因乃縣之杜預曰河南縣西南有梁城卽是縣也水又東南逕注城南司馬彪曰河南梁縣有注城史記魏文侯三十二年敗秦于注者也又與一水合水發注城東坂下東南流注三里水三里水又亂流入於汝汝水又東逕成安縣故城北按地理志潁川郡有成安縣侯國也史記建元以來功臣侯者年表曰漢武帝元朔五年校尉韓千秋擊南越死封其子韓延

年爲成安侯卽此邑矣世謂之白泉城非也俗謬耳汝水又東爲周公渡藉承休之徽號而有周公之嘉稱也汝水又東黃水注之水出梁山東南逕周承休縣故城東爲承休水縣故子南國也漢武帝元鼎四年幸維陽巡省豫州觀于周室邈而無祀詢問耆老乃得孽子嘉封爲周子南君以奉周祀按汲冢古文謂衛將軍文子爲子南彌牟其後有子南勁紀年勁朝于魏後惠成王如衛命子南爲侯秦併六國衛最後滅疑嘉是衛後故氏子南而稱君也初元五年爲周承休邑地理志曰侯國也元帝置元始二年更曰鄭公一清按漢書地理志亦作鄭公而後漢黃

瓊封邲鄉侯章懷注引說文曰邲潁川縣也漢潁川郡有周承休侯國元始二年更名曰邲音克袁紹亦封邲鄉侯此云鄭王莽之嘉美也故汝渡有周公之名蓋藉公不詳其故

邑以納稱也世謂之黃城水曰黃水皆非也其水又東

南逕白茅臺東又南逕梁雀鄉西世謂之期城非也按

後漢書世祖自潁川往梁雀鄉馮魴先詣行所即是邑

也一清按方輿紀要云括地志周承休城一名梁雀塢或云卽梁翟鄉也蓋翟雀字形相似道元以世謂之

期城為非期翟音相水積為陂世謂之黃陂東轉逕其

城南東流右合汝水

又東南過潁川郊縣南

汝水又東與張磨泉合水發北阜春夏水盛則南注汝

水汝水又東分為西長湖湖水南北五十餘步東西三

百步汝水又東扈澗水北出大劉山南逕木蓼堆東郊

城西南流入於汝汝水又右逕為湖湖水南北八九十

步東西四五百步俗謂之東長湖湖水下入汝古養水

也水出魯陽縣北將孤山北長岡下數泉俱發東歷永

仁三堆南又東逕沙川世謂之沙水歷山符壘北又東

逕沙亭南故養陰里也司馬彪郡國志曰襄城有養陰

里京相璠曰在襄城郊縣西南養水名也俗以是水為

沙水故亦名之為沙城非也又城處水之陽而以陰為

稱更用惑焉但流雜閒居裂漑牙移致令川渠異容津

途改狀故物望疑焉又右會董溝水水出沛公壘西六十許步蓋漢祖入關往征是由故地擅斯日矣其水東北注養養水又東北入東長湖亂流注汝水也汝水又逕邾縣故城南春秋昭公十九年楚令尹子瑕之所城也激水注之水出魯陽縣之將孤山東南流許慎云水出南陽魯陽入父城從水敖聲一清按說文繫傳作父城今說文譌呂忱字林亦言在魯陽激水東入父城縣與桓水會桓水出魯陽北山水有二源奇導於賈復城合為一瀆逕賈復城北復南擊郾所築也俗語訛謬謂之寡婦城水曰寡婦水此瀆水有窮通故有枯渠之稱焉其水東北流至

父城縣北右注激水亂流又東北至邾入汝汝水東南左合藍水水出陽翟縣重嶺山東南流逕紀氏城西有層臺謂之紀氏臺續漢書曰世祖車駕西征盜賊羣起邾令馮魴為賊延褒所攻力屈上詣紀氏羣賊自降卽是處在邾城東北十餘里其水又東南流逕黃阜東而南入汝水汝水又東南流右與白溝水合水出夏亭城西又南逕龍城西城西北卽摩陂也縱廣可一十五里魏青龍元年有龍見於邾之摩陂明帝幸陂觀龍於是改摩陂曰龍陂其城曰龍城其水又南入於汝水汝水又東南與龍山水會水出龍山龍溪北流際父城縣故

城東昔楚平王大城城父以居太子建故杜預曰即襄

城之城父縣也馮異據之以降世祖用報中車之恩也

一清按城父城本是二縣漢志潁川郡父城縣下云

應鄉故國沛郡城父縣下云夏肥水東南至下蔡入淮

莽曰思善續志父城屬潁川而城父改隸汝南故特著

曰城父故屬沛春秋時曰夷左氏傳云楚遷許于夷實

城父杜預注曰此時改城父為夷故傳實之又後漢書

馮異傳云潁川父城人也章懷注云父城縣名故城在

今許州葉縣東北汝州郟城縣有父城亦或謂之城父

元和郡縣志云父城故殷時應國左傳楚大城城父以

居太子建是也杜元凱恐後人誤以此城父為遷許之

舊故云即襄城之城父明以別于沛郡也史記正義云

潁川父城縣沛郡城父縣據郡

屬縣其名自分斯言最核也

合俱出龍山北流注之又東北入於汝水汝水又東南

逕襄城縣故城南王隱晉書地道記曰楚靈王築劉向

說苑曰襄城君始封之日服翠衣帶玉佩徙倚于流水

之上即是水也楚大夫莊辛所說處後乃縣之呂后元

年立孝惠後宮子義為侯國王莽更名相城也黃帝嘗

遇牧童于其野故嵇叔夜讚曰奇矣難測襄城小童倦

遊六合來憩茲邦也其城南對汜城周襄王出鄭居汜

即是此城也春秋襄公二十六年楚伐鄭涉汜而歸杜

預曰涉汝水于汜城下也晉襄城郡治京相璠曰周襄

王居之故曰襄城也今置關于其下汝水又東南流逕

西不羹城南春秋左傳昭公十二年楚靈王曰昔諸侯

遠我而畏晉今我大城陳蔡不羹賦皆千乘諸侯其畏

遠我而畏晉今我大城陳蔡不羹賦皆千乘諸侯其畏

我乎東觀漢記曰車騎馬防以前參藥勤勞省闔增封侯國襄城羹亭千二百五十戶卽此亭也汝水又東南逕繁邱城南而東南出也

又東南過定陵縣北

湛水出犍縣北魚齒山西北東南流歷魚齒山下爲湛浦方五十餘步春秋襄公十六年晉伐楚報楊梁之役楚公子格及晉師戰于湛阪楚師敗績遂侵方城之外今水北悉枕翼山阜于父城東南湛水之北山有長阪蓋卽湛水以名阪故有湛阪之名也湛水又東南逕蒲城北京相璠曰昆陽縣北有蒲城蒲城北有湛水者是

也湛水又東於汝水九曲北東入汝杜預亦以是水爲

湛水矣周禮荊州其浸潁湛鄭元云未聞蓋偶有不照

也今考地則不乖其土言水則有符經文矣清按漢志註師古

曰潁水出陽城陽乾山宜屬豫州許慎又云湛水豫州浸蓋川土相鄰故也全氏曰周禮職方荊州之浸潁潁按湛是汝水支流而潁亦與汝互相出入之水也又豫州之浸波澇波亦汝水支流然則汝雖不見于禹貢而未嘗不重于職方康成旣不知湛水汝水又東南逕定

又不知波水非善長之註何以證明汝水又東南逕定

陵縣故城北漢成帝元延三年封侍中衛尉淳于長爲侯國王莽更之曰定城矣東觀漢記曰光武擊王莽二公還到汝水上于涯以手飲水澡頰塵垢謂傅俊曰今日疲倦諸君寧憊也卽是水也水右則澧水左入焉左

則百尺溝出矣溝水夾岸層崇亦謂之爲百尺隄也自定陵城北通潁水於襄城縣潁盛則南播汝洑則北注溝之東有澄潭號曰龍淵在汝北四里許南北百步東西二百步水至清深常不耗竭佳饒魚笱湖溢則東注澗水矣汝水又東南昆水注之水出魯陽縣唐山東南流逕昆陽縣故城西更始元年王莽徵天下能爲兵法者選練武衛招募猛士旌旂輜重千里不絕又驅諸獷獸虎豹犀象之屬以助威武自秦漢出師之盛未嘗有也世祖以數千兵邀之陽關諸將見尋邑兵盛反走入昆陽世祖乃使成國上公王鳳廷尉大將軍王常留守

夜與十三騎出城南門收兵于鄆尋邑圍城數十重雲車十餘丈瞰臨城中積弩亂發矢下如雨城中人負戶而汲王鳳請降不許世祖率營部俱進頻破之乘勝以敢死三千人徑衝尋邑兵敗其中堅于是水之上遂殺王尋城中亦鼓譟而出中外合勢震呼動天地會大雷風屋瓦皆飛莽兵大潰昆水又屈逕其城南世祖建武中封侍中傅俊爲侯國故後漢郡國志有昆陽縣蓋藉水以氏縣也一清按漢志潁川郡昆陽縣應劭曰昆水出南陽昆水又東逕定陵城南又東注汝水汝水又東南逕奇額城西北今南潁川郡治也瀆水出焉世亦謂之大灑水爾雅曰河有



雍汝有瀆然則瀆者汝別也

全氏曰公羊子曰瀆泉者直泉也直泉者涌泉也釋

名本之其音讀如瀆謂自下而上也瀆則其聲之轉也後卷小瀆水下有汾陂善長亦曰汾俗音糞蓋汾即瀆之通也詩曰遵彼汝墳蓋汝旁之水為瀆則汝旁之土亦為墳謂突起也如禹貢赤埴墳之墳毛公乃以大防解之非也觀孟子則汝水宜決不宜防也故其下夾水之邑猶流汝陽之名

是或瀆瀆之聲相近矣亦或下合瀆潁兼統厥稱耳

又東南過鄆縣北

汝水逕奇額城西東南流其城襟帶兩水側背雙流汝

水又東南流逕鄆縣故城北故魏下邑也史記楚昭陽

伐魏取鄆是也汝水又東得醴水口水出南陽雒縣亦

云導源雒衡山即山海經云衡山也郭景純以為南嶽

非也馬融廣成頌曰面據衡陰指謂是山在雒縣界故

世謂之雒衡山依山海經不言有水焉然醴水東流歷

唐山下即高鳳所隱之山也醴水又東南與臯水合水

發臯山郭景純曰或作章山東流注於醴水醴水又東

南逕唐城北南入城而西流出城城蓋因山以即稱矣

醴水又屈而東南流逕葉縣故城北春秋昭公十五年

許遷于葉者也楚盛周衰控霸南土欲爭強中國多築

列城于北方以逼華夏故號此城為萬城或作方城唐

勒奏土論曰我是楚也世霸南土自越以至葉垂宏境

萬里故號曰萬城也余按春秋屈完之在召陵對齊侯

曰楚國方城以爲城杜預曰方城山名也在葉南未詳孰是楚惠王以封諸梁子高號曰葉公城卽子高之故邑也葉公好龍神龍下之河東王喬之爲葉令也每月望常自詣朝堂帝怪其來數而不見車騎顯宗密令太史伺望之言其臨至輒有雙鳧從東南飛來于是候鳧至舉羅張之但得一隻鳧乃詔尚方診視則四年中所賜尚書官屬履也每當朝時葉門下鼓不擊自鳴聞于京師後天下玉棺于堂前吏民推排終不搖動喬曰天帝獨欲召我耶乃沐浴服飾寢其中蓋便立覆宿昔葬于城東土自成墳其夕縣中牛皆流汗喘乏而人無知

者百姓爲立廟號葉君祠牧守每班錄皆先謁拜之吏民祈禱無不如應若有違犯亦立能爲崇帝乃迎取其鼓置都亭下畧無復聲焉或云卽古仙人王喬也是以于氏書之于神化醴水又逕其城東與燒車水合水西出苔萊山東流側葉城南而下注醴水醴水又東逕葉公廟北廟前有葉公子高諸梁碑舊秦漢之世廟道有雙闕几筵黃巾之亂殘毀頽闕魏太和景初中令長修飾舊宇後長汝南陳晞以正始元年立碑碑字破落遺文殆存事見其碑醴水又東與葉西陂水會縣南有方城山屈完所謂楚國方城以爲城者也山有湧泉北流

畜之以為陂陂塘方二里陂水散流又東逕葉城南而  
 東北注醴水醴水又東注葉陂陂東西十里南北七里  
 二陂竝諸梁之所竭也陂水又東逕灃陽縣故城北又  
 東逕定陵城南東與芹溝水合其水導源葉縣東逕灃  
 陽城北又東逕定陵縣南又東南流注醴其水逕流昆  
 醴之間纏絡四縣之中疑即呂忱所謂混水也今於定  
 陵更無別水唯是水可當之醴水東逕鄆縣故城南左  
 入汝一清按漢志南陽郡雒縣醴水東至鄆入汝師古曰鄆音屋考醴水東至鄆縣入汝今河南許州鄆城縣是也鄆字誤耳師古更以屋音釋之廣韻集韻始出鄆字云地名在南陽皆為謬也山海經曰  
 灃水東流注於視水也一清按郭璞註云或曰視宜為灃漢志南陽郡舞陰縣灃水所

出東至上蔡入汝全氏曰山經所云灃水注視灃乃濯字之訛濯水注灃灃水不注灃也汝水又東

南流逕鄧城西春秋左傳桓公二年蔡侯鄭伯會于鄧者也汝水又東南流灃水注之

又東南過汝南上蔡縣西

汝南郡楚之別也漢高祖四年置王莽改郡曰汝濱清

按漢志汝南郡高帝置莽曰汝汾分為賞都尉縣故蔡國周武王克殷封其弟

叔度于蔡世本曰上蔡也九江有下蔡故稱上竹書紀年曰魏章率師及鄭師伐楚取上蔡者也永初元年安帝封鄧騭為侯國汝水又東逕懸瓠城北王智深云汝南太守周矜起義于懸瓠者是矣今豫州刺史汝南郡

治城之西北汝水枝別左出西北流又屈西東轉又西南會汝形若垂瓠者彥云城北名馬灣中有地數頃上有栗園栗小殊不並固安之實也然歲貢三百石以充天府水渚即栗洲也樹木高茂望若屯雲積氣矣林中有栗堂射埽甚閒敞牧宰及英彥多所游薄其城上西北隅高祖以太和中幸懸瓠平南王肅起高臺于小城建層樓于隅阿下際水湄降眺栗渚左右列榭四周參差競峙奇為佳觀也

又東南過平輿縣南

溱水出浮石嶺北青衣山亦謂之青衣水也東南逕

陵縣故城西應劭曰西南有朗陵山縣以氏焉世祖建

武中封城門校尉臧宮為侯國也溱水又南屈逕其縣

南又東北逕北宜春縣故城北王莽更名之為宣屏也

豫章有宜春故加北矣元初三年安帝封后父侍中閻

暢為侯國溱水又東北逕馬香城北又東北入汝汝水

又東南逕平輿縣南安城縣故城北王莽更名至成也

漢武帝元光六年封長沙定王子劉蒼為侯國矣一清按

隱曰在豫章地理志豫章郡無此縣汝水又東南汝水

首受慎水於慎陽縣故城南一清按漢志慎陽縣師

古曰慎字本作慎音真更刻遂誤以水為心 陂水兩分一水自陂北逶慎陽城

四圍城塹潁川荀淑遇縣人黃叔度于逆旅與語移日  
 曰子吾師表也范奕論曰黃憲言論風旨無所傳聞然  
 士君子見之者靡不服深遠去疵吝將以道周性全無  
 得而稱乎塹水又自瀆東北流注北陂一水自陂東北  
 流積爲鮦陂陂水又東北又結而爲陂世謂之窖陂陂  
 水上承慎陽縣北陂東北流積而爲土陂陂水又東爲  
 窖陂陂水又東南流注壁陂陂水又東北爲太陂陂水  
 又東入汝汝水又東南逕平陵亭北又東南逕陽遂鄉  
 北汝水又東逕櫟亭北春秋之棘櫟也杜預曰汝陰新  
 蔡縣東北有櫟亭今城在新蔡故城西北城北半淪水

汝水又東南逕新蔡縣故城南昔管蔡間王室放蔡叔  
 而遷之其子胡能率德易行周公舉之爲魯卿士以見  
 于王王命之以蔡申呂地也以奉叔度祀是爲蔡仲矣  
 宋忠曰故名其地爲新蔡王莽所謂新遷者也世祖建  
 武元年封吳國爲侯國一清按後漢書吳漢傳國封在  
 建武二十八年此云元年誤也  
 汝南先賢傳曰新蔡鄭敬字次都爲郡功曹都尉高懿  
 廳事前有槐樹白露類甘露者懿問掾屬皆言是甘露  
 敬獨曰明府政未能致甘露但樹汁耳懿不悅託疾而  
 去汝水又東南左會澠水水上承汝水別流於奇額城  
 東東南流爲練溝逕召陵縣西東南流注上蔡西岡北

為黃陵陂陂水東流於上蔡岡東為蔡塘又東逕平輿

縣故城南為潏水

一清按說文潏水出汝南上蔡黑澗澗入汝

縣舊沈國也

有沈亭春秋定公四年蔡滅沈以沈子嘉歸後楚以為

縣史記曰秦將李信攻平輿敗之者也建武三十年世

祖封銚統為侯國

朱氏謀埭箋曰後漢書銚期傳子統封建平侯非平輿

本汝南

郡治昔費長房為市吏見王壺公縣壺郡市長房從之

因而自遠同入此壺隱淪仙路骨謝懷靈無會而返雖

能役使鬼神而終同物化城南里餘有神廟世謂之張

明府祠水旱之不節則禱之廟前有圭碑文字紊碎不

可復尋碑側有小石函按桂陽先賢畫讚臨武張熹字

季智為平輿令時天大旱熹躬禱雩未獲嘉應乃積柴

自焚主簿侯崇小史張化從熹焚焉火既燎天靈感應

即澍雨此熹自焚處也潏水又東南左迤為葛陂陂方

數十里水物含靈多所苞育昔費長房投杖于陂而龍

變所在也又劾東海君子是陂矣陂水東出為鯛水俗

謂之三丈陂亦曰三嚴水水逕鯛陽縣故城南應劭曰

縣在鯛水之陽

一清按漢志汝南郡鯛陽縣孟康曰音紂此是缺誤師古章懷音訓並承其失

據太平寰宇記蔡州新蔡縣下云鯛音紂紅反漢明帝說文鯛直龍切此與紂紅之音相近為可證也

永平中封衛尉陰興子慶為侯國也縣有葛陵城建武

十五年更封銚侯銚丹為侯國

全氏曰丹以安成徙封非銚城之東

北有楚武王冢民謂之楚王琴一清按皇覽曰民謂之楚王岑蓋山陵之異名  
 城北祝社里下土中得銅鼎銘曰楚武王是知武王隧也  
 鮑陂東注為富水水積之處謂之陂塘津渠交絡枝布川隰矣澹水自葛陂東南逕新蔡縣故城東而東南流注於汝水又東南逕下桑里左逕為橫塘陂又東北為青陂者也汝水又東南逕壺邱城北故陳地春秋左傳文公九年楚侵陳剋壺邱以其服于晉是也汝水又東與青陂合水上承慎水於慎陽縣之上慎陂右溝北注馬城陂陂西有黃邱亭陂水又東逕新息亭北又東為網陂陂水又東逕新息縣結為牆陂陂水又東逕遂

鄉東南而為壁陂又東為青陂陂東對大呂亭春秋外傳曰當成周者南有荆蠻申呂姜姓矣蔡平侯始封也西南有小呂亭故此稱大也側陂南有青陂廟廟前有陂漢靈帝建寧三年新蔡長河南緱氏李言上請修復青陂司徒臣訓尚書臣龔奏可洛陽宮于青陂東塘南樹碑碑稱青陂在縣坤地源起桐柏淮川別流入于潺湲逕新息牆陂衍入褒信界灌溉五百餘頃陂水又東分為二水一水南入淮一水東南逕白亭北又東逕吳城南史記楚惠王二年子西召太子建之子勝于吳勝入居之故曰吳城也又東北屈逕壺邱東而北流注於汝

水世謂之薄谿水汝水又東逕褒信縣故城北而東注矣

又東至原鹿縣

汝水又東南逕原鹿縣故城西杜預釋地曰汝陰有原

鹿縣也

南入於淮

所謂汝口側水有汝口戍淮汝之交會也

水經注釋卷二十一終

水經注釋卷二十二

水經注釋卷二十二 秦太室山 清誠夫錄

又東南 潁水

洧水

潁水

潏水

潏水

潁水出潁川陽城縣西北少室山

秦始皇十七年滅韓以其地為潁川郡蓋因水以著稱者也漢高帝二年以為韓國王莽之左隊也山海經曰

潁水出少室山地理志曰出陽城縣陽乾山今潁水有三源奇發右水出陽乾山之潁谷春秋潁考叔為其封人其水東北流中水導源少室通阜東南流逕負黍亭



東春秋定公六年鄭伐馮滑負黍者也馮敬通顯志賦曰求善卷之所在遇許由于負黍京相璠曰負黍在潁川陽城縣西南二十七里世謂之黃城也亦或謂是水為灑水東與右水合左水出少室南谿東合潁水故作者乃舉二三言水所發也呂氏春秋曰卞隨恥受湯讓自投此水而死張顯逸民傳嵇叔夜高士傳竝言投河水而死未知其孰是也

又東南過其縣南

潁水又東五渡水注之其水導源崇高縣東北太室東谿縣漢武帝置以奉太室山俗謂之崧陽城及春夏雨

泛水自山頂而迭相灌澍嶠流相承為二十八浦也暘旱輟津而石潭不耗道路遊憩者唯得飡飲而已無敢澡盥其中苟不如法必數日不豫是以行者憚之山下大澤周數里而清深肅潔水中有立石高十餘丈廣二十許步上甚平整緇素之士多泛舟昇陟取暢幽情其水東流逕陽城西石澗縈委溯者五涉故亦謂之五渡水東南流入潁水潁水逕其縣故城南昔舜禪禹禹避商均伯益避啓竝于此也亦周公以土圭測白景處漢成帝永始元年封趙臨為侯國也沈氏曰本表封成陽不封陽城成陽屬汝南不屬潁川縣南對箕山山上有許由冢堯所封也故太史

公曰余登箕山之上有許由墓焉山下有牽牛墟側潁水有犢泉是巢父還牛處也石上犢跡存焉又有許由廟碑闕尙存是漢潁川太守朱寵所立潁水逕其北東與龍淵水合其水導源龍淵東南流逕陽城北又東南入于潁潁水又東平洛溪水注之水發玉女臺下平洛澗世謂之平洛水呂忱所謂勺水出陽城山蓋斯水也又東南流注于潁潁水又東出陽關歷康亭城南魏明帝封尙書右僕射衛臻爲康鄉侯此卽臻封邑也

又東南過陽翟縣北

潁水東南流逕陽關聚聚夾水相對俗謂之東西二土

城也潁水又逕上棘城西又屈逕其城南春秋左傳襄公十八年楚師伐鄭城上棘以涉潁者也縣西有故堰堰石崩褫頽基尙存舊過潁水枝流所出也其故瀆東南逕三封山北今無水渠中又有泉流出焉時人謂之嵎水東逕三封山東東南歷大陵西連山亦曰啓筮亭啓亭神于大陵之上卽鈞臺也春秋左傳曰夏啓有鈞臺之饗是也杜預曰河南陽翟縣南有鈞臺其水又東南流水積爲陂陂方十里俗謂之鈞臺陂蓋指鈞臺取名也又西南流逕夏亭城西又屈而東南爲邾之摩陂潁水自竭東逕陽翟縣故城北夏禹始封于此爲夏國

故武王至周曰吾其有夏之居乎遂營洛邑徐廣曰河南陽城陽翟則夏地也春秋經書秋鄭伯突入于櫟左傳曰桓公十五年突殺檀伯而居之服虔曰檀伯鄭守櫟大夫櫟鄭之大都宋忠曰今陽翟也周末韓景侯自新鄭徙都之王隱曰陽翟本櫟也故潁川郡治也城西有郭奉孝碑側水有九山祠碑叢柏猶茂北枕川流也又東南過潁陽縣西又東南過潁陰縣西南

應劭曰縣在潁水之陽故邑氏之按東觀漢記漢封車騎將軍馬防爲侯國防城門校尉位在九卿上絕席潁水又南逕潁鄉城西潁陰縣故城在東北舊許昌典農

都尉治也後改爲縣魏明帝封侍中辛毗爲侯國也潁水又東南逕柏祠曲東歷罌邱城南故汾邱城也春秋左傳襄公十八年楚子庚治兵于汾司馬彪曰襄城縣有汾邱杜預曰在襄城縣之東北也逕繁昌故縣北曲蠡之繁陽亭也魏書國志曰文帝以漢獻帝延康元年行至曲蠡登壇受禪于是地改元黃初其年以潁陰之繁陽亭爲繁昌縣城內有三臺時人謂之繁昌臺壇前有二碑昔魏文帝受禪于此自壇而降曰舜禹之事吾知之矣故其石銘曰遂于繁昌築靈壇也於後其碑六字生金論者以爲司馬金行故曹氏六世遷魏而事晉

也潁水又東南流逕青陵亭城北北對青陵陂陂縱廣二十里潁水逕其北枝入為陂陂西則澇水注之水出襄城縣之邑城下東流注于陂陂水又東入臨潁縣之狼陂潁水又東南流而歷臨潁縣也名勝志引水經注曰潁水又東逕蔡龍城即古參龍氏之邑也城西有拒陵岡今本無之一清按寰宇記云參龍城在臨潁縣西四十里北周書泉企傳拒陽人杜窟即拒陵也古陽陵字每互用方輿紀要許州臨潁縣有大陵城引注文正同大陵見上陽翟縣及潁水注中


又東南過臨潁縣南又東南過汝南潁強縣北洧水從河南密縣東流注之

臨潁舊縣也潁水自縣西注小潁水出焉爾雅曰潁別

為沙郭景純曰皆大水溢出別為小木之名也亦猶江別為沱也潁水又東南逕舉城北即古臯城亭矣春秋經書公及諸侯盟于臯鼬者也臯舉字相似名與字乖耳潁水又東逕潁陽城南竹書紀年曰孫何取潁陽潁強城在東北潁水不得逕其北潁水又東南潁水入焉非洧水也

又東過西華縣北

王莽更名之曰華望也有東故言西矣世祖光武皇帝建武中封鄧晨為侯國漢濟北戴封字平仲為西華令遇天旱慨治功無感乃積柴坐其上以自焚火起而大



雨暴至遠近歎伏永元十三年徵太常焉縣北有習陽城潁水逕其南也經所謂洧水流注之也

又南過女陽縣北


縣故城南有汝水枝流故縣得厥稱矣闕駟曰本汝水別流其後枯竭號曰死汝水故其字無水余按汝女乃方俗之音故字隨讀改未必一如闕氏之說以窮通損字也潁水又東大灑水注之又東南逕博陽縣故城東城在南頓縣北四十里漢宣帝封邴吉為侯國王莽更名樂嘉一清按漢志作樂家

又東南過南頓縣北灑水從西來流注之

灑水于樂嘉縣入潁不至于頓頓故頓子國也周之同姓春秋僖公二十五年楚伐陳納頓子于頓是也俗謂之潁陰城非也潁水又東南逕陳縣南又東南左會交口者也

又東南至新陽縣北蕩蕩渠水從西北來注之

經云蕩蕩渠者百尺溝之別名也南合交口新溝自是東出潁上有堰謂之新陽堰俗謂之山陽塌非也新溝自潁北東出縣在水北故應劭曰縣在新水之陽今縣故城在東明潁水不出其北蓋經誤耳潁水自堰東南流逕項縣故城北春秋僖公十七年魯滅項是矣潁水




又東右合谷水上承平鄉諸陂東北逕南頓縣故城南側城東注春秋左傳所謂頓迫于陳而奔楚自頓徙南故曰南頓也今其城在頓南三十餘里又東逕項城中楚襄王所郭以為別都都內西南小城項縣故城也舊潁州治谷水逕小城北又東逕魏豫州刺史賈逵祠北王隱言祠在城北非也廟在小城東昔王凌為宣王司馬懿一清按三所執屆廟而歎曰賈梁道王凌魏之忠臣唯汝有靈知之遂仰鴛而死廟前有碑碑石生金干寶曰黃金可採為晉中興之瑞谷水又東流出城東注潁潁水東側有公路城袁術所築也故世因以術字

名城矣潁水又東逕臨潁城北城臨水闕南面又東逕雲陽二城間南北翼水並非所具又東逕邱頭邱頭南枕水魏書郡國志曰宣王軍次邱頭王凌面縛水次故號武邱矣庾林曰司馬懿雖嘗討王凌至邱頭而武潁邱之名至司馬昭克諸葛誕始改本注誤水又東南流於故城北細水注之一清按細水說文作洳从水自聲水土承陽都陂陂水枝分東南出為細水東逕新陽縣故城北又東南逕宋縣故城北縣即所謂鄆邱者也秦伐魏取鄆邱謂是邑矣漢成帝綏和元年詔封殷後于沛以存三統平帝元始四年改曰宋公章帝建初四年徙邑于此故號新鄆為宋公國也王莽之新延矣細水又


南逕細陽縣新溝水注之新溝水首受交口東北逕新陽縣故城南漢高帝六年封呂青為侯國王莽更名曰新明也故應劭曰縣在新水之陽今無水故渠舊道而已東入澤渚而散流入細細水又東南逕細陽縣故城南王莽更之曰樂慶也世祖建武中封岑彭子遵為侯國細水又東南積而為陂謂之次塘公私引裂以供田溉又東南流屈而西南入潁地理志曰細水出細陽縣東南入潁一清按今漢志無是文師古曰居細水之陽故曰細陽細水出新鄭潁水又東南流逕胡城東故胡子國也春秋定公十五年楚滅胡以胡子豹歸是也杜預釋地曰女陰縣西北有胡城也

潁水又東南汝水枝津注之水上承汝水別瀆于奇頴城東三十里世謂之大灑水也東南逕召陵縣故城南春秋左傳僖公四年齊桓公師于召陵責楚貢不入即此處也城內有大井徑數丈水至清深闕駟曰召者高也其地邱墟井深數丈故以名焉又東南逕征羌縣故召陵縣之安陵鄉安陵亭也世祖建武十一年以封中郎將來歙歙以征定西羌功故更名征羌也一清按後漢書來歙傳曰以歙有平羌隴之功故改汝南之當鄉縣為征羌國焉漢志汝南郡無此縣名續志云汝南郡召陵縣有安陵鄉征羌侯國有安陵亭與闕駟引戰國策以為秦酈注合本傳之云所未詳也昭王欲易地謂此也一清按地理志雋陵李奇曰六國為安陵在潁川不在汝南汝



水別濱又東逕公路臺北臺臨水百步袁術所築也汝水別濱又東逕西門城卽南利也漢宣帝封廣陵厲王子劉昌爲侯國縣北三十里有孰城號曰北利故濱出于二利之間間關女陽之縣世名之曰死汝縣取水名故曰女陽也又東逕南頓縣故城北又東南逕銅陽城北又東逕郟鄉城北又東逕固始縣故城北地理志縣故滯也滯邱在南故藉邱名縣矣全氏曰按漢志汝南郡有滯縣應劭以爲滯邱故劉奉世滯邱淮陽國有固始縣顏師古又以爲滯邱故劉奉世疑之曰既別有固始則此滯疑更一地子謂非也睢陽之固始與滯本一地而分爲二縣漢王追項羽至固陵晉灼曰卽固始也師古曰後改爲固始耳地理志屬淮陽續志光武改滯爲固始而淮陽之固始則并省陳之陽夏故陽夏有固陵聚劉昭補注引晉灼云汝南固始

縣以實之則二縣本相接也又何疑乎滯之更是一地乎但今漢志則無固始故滯之文未知所據也王莽更名之曰閭治孫叔敖以土浸薄取而爲封故能縣嗣城北猶有叔敖碑建武二年司空李通又慕叔敖受邑故光武以嘉之更名固始別汝又東逕蔡岡北岡上有平陽侯相蔡昭家昭字叔明周后稷之冑冢有石闕闕前有二碑碑字淪碎不可復識羊虎傾低殆存而已枝汝又東北流逕胡城南而東歷女陰縣故城西北東入潁水潁水又東逕女陰縣故城北史記高祖功臣侯者年表曰高祖六年封夏侯嬰爲侯國王莽更名之曰汝墳也縣在汝水之陰故以汝水納稱城西有一城故





陶邱鄉也汝陰郡治

全氏曰晉志汝陰郡魏置首汝陰縣後魏志汝陰郡晉武帝置治社

亭城外東北隅有舊臺翼城若邱俗謂之女邱臺雖經

頽毀猶自廣崇上有一井疑故陶邱鄉所未詳

又東南至慎縣東南入于淮

潁水東南流左合上吳百尺二水俱承次塘細陂南流

注于潁潁水又東南江陂水注之水受大漂陂陂水南

流積為江陂南逕慎城西側城南流入于潁潁水又逕

慎縣故城南縣故楚邑白公所居以拒吳春秋左傳哀

公十六年吳人伐慎白公敗之王莽之慎治也世祖建

武中封劉賜為侯國潁水又東南逕蜩螗郭東俗謂之

鄭城矣

一清按功臣侯表宣帝神爵三年封鄭吉為安遠侯表云慎縣知此城為吉封邑也

又東

南入于淮春秋昭公十二年楚子狩于州來次于潁尾

蓋潁水之會淮也

洧水出河南密縣西南馬領山

水出山下亦言出潁川陽城山

一清按此是班固說

山在陽城縣

之東北蓋馬領之統目焉洧水東南流逕一故臺南俗

謂之陽子臺又東逕馬領塢北塢在山上塢下泉流北

注亦謂洧別源也而入于洧水洧水東流綏水會焉水

出方山綏谿即山海經所謂浮戲之山也東南流逕漢

宏農太守張伯雅墓塋域四周壘石為垣隅阿相降列

於綏水之陰庚門表二石闕夾對石獸於闕下冢前有石廟列植三碑碑云德字伯雅河南密人也碑側樹兩石人有數石柱及諸石獸矣舊引綏水南入瑩域而為池沼沼在丑地皆蟾螭吐水石隍承溜池之南又建石樓石廟前又翼列諸獸但物謝時淪凋毀殆盡夫富而非義比之浮雲況復此乎王孫士安斯為達矣綏水又東南流逕上郭亭南東南注洧洧水又東襄荷水注之水出北山子節谿亦謂之子節水東南流注于洧洧水又東會瀝滴泉水出深谿之側泉流丈餘懸水散注故世士以瀝滴稱南流入洧水也

又東南過其縣南

洧水又東南流與承雲二水合俱出承雲山二源雙導東南流注于洧世謂之東西承雲水洧水又東微水注之水出微山東北流入于洧洧水又東逕密縣故城南春秋謂之新城左傳僖公六年會諸侯伐鄭圍新密鄭所以不時城也今縣城東門南側有漢密令卓茂祠茂字子康南陽宛人溫仁寬雅恭而有禮人有認其馬者茂與之曰若非公馬幸至丞相府歸我遂挽車而去後馬主得馬謝而還之任漢黃門郎遷密令舉善而教口無惡言教化大行道不拾遺蝗不入境百姓為之立祠

享祀不輟矣洧水又左會瓌泉水水出玉亭西北流注于洧洧水又東南與馬關水合水出玉亭下東北流歷馬關謂之馬關水又東北注于洧洧水又東合武定水水北出武定岡西南流又屈而東南流逕零鳥塢西側塢東南流塢側有水懸流赴壑一匹有餘直注澗下淪積成淵嬉遊者矚望奇為佳觀俗人覩此水挂于塢側遂目之為零鳥水東南流入于洧洧水又東與虎牘山水合水發南山虎牘谿東北流入洧洧水又東南赤澗水注之水出武定岡東南流逕皇臺岡下又歷岡東東南流注于洧洧水又東南流潛水注之洧水又東南逕

鄆城南世本日陸終娶于鬼方之妹謂之女隤朱氏箋引世本

作女是生六子孕三年啓其左脅三人出焉破其右脅

三人出焉其四曰求言是為鄆人鄆人者鄭是也按一清

記楚世家陸終生子六人四曰會人裴駟集解引世本日會人者鄭是也鄭字誤當作鄆小司馬索隱曰系本

云四曰求言是為鄆人毛詩正義曰陸終生子六人四曰會人案世本會人即檜之祖也鄭桓公問

于史伯曰王室多難予安逃死乎史伯曰號鄆公之民遷之可也鄭氏東遷號鄆獻十邑焉劉楨云鄆在豫州

外方之北北鄰于號都滎之南左濟右洛居陽鄭兩水

之間全氏曰考潛洧之交並無陽水但有陰水耳左傳陰阪陰口是也古文陽从陽陰从阴字近致訛

食潛洧焉徐廣曰鄆在密縣妘姓矣不得在外方之北

也洧水又東逕陰坂北水有梁焉俗謂是濟為參辰口  
 左傳襄公九年晉伐鄭濟于陰坂次于陰口而還是也  
 杜預曰陰坂洧津也服虔曰水南曰陰口者水口也參  
 陰聲相近蓋傳呼之謬耳又晉居商參之分實沈之士  
 鄭處辰火之野闕伯之地軍師所次故濟得其名也全氏  
曰按商參孫汝澄云當作觜參何焯曰非也參當作畢  
 說文畢商星也非二十八宿之參唐韻讀作所今切予  
 謂義門以說文立異而不細讀此注夫商星之畢何以  
 亦為實沈之主乎且畢為晉分見于何書况善長引服  
 氏語謂參陰聲相近今改而為所今切幾何不千里而  
 遙也然則尚不如孫說之近是矣且善長此數語本屬  
 傳會以晉為實沈之士而軍師所次即以名其水口固  
 未必然若鄭何嘗是闕伯之士乎此不足深辨者也

又東過鄭縣南澗水從西北來注之

洧水又東逕新鄭縣故城中左傳襄公元年晉韓厥荀  
 偃帥諸侯伐鄭入其郛敗其徒兵於洧土是也竹書紀  
 年晉文侯二年同惠王子多父伐鄆克之乃居鄭父之  
 邱名之曰鄭是曰桓公一清按漢志河南郡新鄭縣應  
 劭引國語曰周幽王敗桓公死  
 之其子武公與平王東遷洛邑遂伐虢儉而并其地而  
 邑于此京兆尹鄭縣應劭曰宣王母弟友所封也其子  
 與平王東遷更稱新鄭史記鄭世家桓公初封于鄭索  
 隱引系本云桓公居滅林徙拾宋忠曰滅林與拾皆舊  
 地名是封桓公乃名為鄭耳然則居鄭父之邱者是桓  
 公之子武公而誤以為桓公者蓋竹書之謬道元于渭  
 水篇已  
 詳辨之  
 皇甫士安帝王世紀云或言縣故有熊氏之墟  
 黃帝之所都也鄭氏徙居之故曰新鄭矣城內有遺祠  
 名曰章乘是也洧水又東為洧淵水春秋傳曰龍鬪於

時門之外洧淵則此潭也今洧水自鄭城西北入而東南流逕鄭城南城之南門內舊外蛇與內蛇鬪內蛇死六年大夫傅瑕殺鄭子入厲公自是徵也水南有鄭莊公望母臺莊姜惡公寤生與段京居段不弟姜氏無訓莊公居夫人于城穎誓曰不及黃泉無相見也故成臺以望母用伸在心之思感考叔之言忻大隧之賦洩洩之慈有嘉融融之孝得常矣洧水又東與黃水合經所謂澮水非也黃水出太山南黃泉東南流逕華城西史伯謂鄭桓公曰華君之士也韋昭曰華國名矣史記秦昭王三十三年白起攻魏拔華陽走芒卯斬首十五萬


司馬彪曰華陽亭名在密縣嵇叔夜嘗採藥于山澤學琴于古人即此亭也黃水東南流又與上水合水出兩塘中一源兩分泉流派別東為七虎淵水西流即是水也其水西南流注于黃水黃即春秋之所謂黃崖也故杜預云苑陵縣西有黃水者也又東南流水側有二臺也謂之積粟臺東即二水之會也捕獐山水注之水東出捕獐山西流注于黃水黃水又南至鄭城北東轉於城之東北與黃溝合水出捕獐山東南流至鄭城東北入黃水黃水又東南逕龍淵泉東南七里溝水注之水出隙候亭東南平地東注又屈而南流逕升城東又

其一清按此處有脫誤南歷燭城西卽鄭大夫燭之武邑也又南流注于洧水也

又東南過長社縣北

洧水東南流南濮北濮二水入焉洧水又東南與龍淵水合水出長社縣西北有故溝上承洧水水盛則通注龍淵水減則津渠輟流其濱中滋泉南注東轉爲淵淥水平潭清潔澄深俯視遊魚類若乘空矣所謂淵無潛鱗也又東逕長社縣故城北鄭之長葛邑也春秋隱公五年宋人伐鄭圍長葛是也後社樹暴長故曰長社魏潁川郡治也余以景明中出宰茲郡於南城西側修立

客館版築旣興於土下得一樹根甚壯大疑是故社怪長暴茂者也稽之故說縣無龍淵水名蓋山近世矣京相璠春秋土地名曰長社北界有稟水但是水導於隍塹之中非北界之所謂又按京杜地名竝云長社縣北有長葛鄉斯乃縣徙于南矣然則是水卽稟水也其水又東南逕棘城北左傳所謂楚子伐鄭救齊次于棘澤者也稟水又東左注洧水洧水又東南分爲二水也其枝水東北流注沙一水東逕許昌縣故許男國也姜姓四岳之後矣穆天子傳所謂天子見許男于洧上者也漢章帝建初四年更封馬光爲侯國春秋佐助期曰漢



以許昌失天下及魏承漢歷遂改名許昌也城內有景福殿基魏明帝太和中造準價八百餘萬洧水又東入汶倉城內俗以是水為汶水故有汶倉之名非也蓋洧水之邸閣耳洧水又東逕僞陵縣故城南李奇曰六國為安陵也昔秦求易地唐且受使于此春秋分記曰鄢陵六年晉敗楚于鄢陵即此六國時曰安陵兩漢晉為鄢陵縣俱屬潁川郡按後漢志曰春秋時曰鄢注曰克段于鄢晉敗楚于鄢陵釋例亦然知其為鄭之鄢無疑惟是漢陳留郡有曰僞王莽所易為順通在東漢屬梁國者是也應劭于前漢志誤以陳留之僞為克段之鄢水經據以為正謂克段于陽其地在漢陳留杜預誤作潁川鄢陵蓋從應劭注耳此自應誤何得云杜誤乎一清按今本水經注浚儀渠其一者東南過陳縣也下及淮水出梁郡僞縣卷中俱無克段之文克齋所引豈無別據耶蓋是書多缺失耳寰宇記鄢城在宋州柘城縣北

二十九里春秋時寔陳株野地鄭伯克段之鄢在潁川不在陳留也漢高帝十二年封都尉諸潁為侯國王莽更名左亭洧水又東僞陵陂水注之水出僞陵南陂東西南流注于洧水也

又東南過新汲縣東北

洧水自僞陵東逕桐邱南俗謂之天井陵又曰岡非也洧水又屈而南流水上有梁謂之桐門橋蓋藉桐邱以取稱亦言取桐門亭而目焉然不知亭之所在未之詳也洧水又東南逕桐邱城春秋左傳莊公二十八年楚伐鄭鄭人將奔桐邱即此城也杜預春秋釋地曰潁川許昌城東北京相璠曰鄭地也今國無而城見存西南

去許昌故城可三十五里俗名之曰隄其城南即長堤  
 固洧水之北防也西面桐邱其城邪長而不方蓋憑邱  
 之稱即城之名矣洧水又東逕新汲縣故城北漢宣帝  
 神爵二年置于許之汲鄉曲洧城以河內有汲縣故加  
 新也漢章帝建初四年封執金吾馬光為侯國沈氏曰  
書本傳馬光無新汲之封而建初四年所按後漢  
封即許昌也已見上文此蓋復出之錯簡城在洧水南  
 隄上又東洧水右迤為濩陂洧水又逕匡城南扶溝之  
 匡亭也又東洧水左迤為鴨子陂謂之大穴口也

又東南過茅城邑之東北

洧水自大穴口東南逕洧陽城西南逕茅城東北又南

左合甲庚溝溝水上承洧水於大穴口東北枝分東逕

洧陽故城南俗謂之復陽城非也蓋洧復字類音讀變

漢建安中封司空祭酒郭奉孝為侯國其水又東南為

鴨子陂陂廣一十五里餘波南入甲庚溝西注洧東北

瀉沙洧水又南逕一故城西世謂之思鄉城西去洧十

五里洧水又右合濩陂水上承洧水於新汲縣南逕新

汲縣故城東又南積而為陂陂之西北即長舍城全氏

舍即長陂水東翼洧隄西面茅邑自城北門列築隄道

迄于此岡世尚謂之茅岡即經所謂茅城邑也陂水北

出東入洧津西北納溟流



又東過習陽城西折入于潁

洧水又東南逕辰亭東俗謂之田城非也蓋田辰聲相近城亭音韻聯故也經書魯宣公十一年楚子陳侯鄭伯盟於辰陵也京相璠曰潁川長平有故辰亭杜預曰長平縣東南有辰亭今此城在長平城西北長平城在東南或杜氏之謬傳書之誤耳長平東南淋陂北畔有一阜東西減里南北五十許步俗謂之新亭臺又疑是杜氏所謂辰亭而未之詳也洧水又南逕長平縣故城西王莽之長正也洧水又南分為二水枝水東出謂之五梁溝逕習陽城北又東逕赭邱南邱上有故城郡國

志曰長平故屬汝南縣有赭邱城即此城也又東逕長平城南東注滂陂洧水南出謂之雞籠水水會有籠口之名矣洧水又東逕習陽城西西南折入潁地理志曰洧水東南至長平縣入潁者也

潁水出河南密縣大騮山

大騮即具茨山也黃帝登具茨之山升于洪隄之上受神芝圖于黃蓋童子即是山也潁水出其阿流而為陂俗謂之玉女池東逕陘山北史記魏襄王六年敗楚于陘山者也山上有鄭祭仲冢冢西有子產墓累石為方墳墳東有廟竝東北向鄭城杜元凱言不忘本際廟舊

有一枯柏樹其塵根故株之上多生稚柏。列秀青青。望之奇可嘉矣。澗水又東南逕長社縣故城西北南澗北澗二水出焉。劉澄之著永初記云水經澗水源出大騮山東北流注泗衛靈聞音於水上殊為乖矣。余按水經為澗水不為澗也是水首受澗水川渠雙引俱東注有洧與之過沙枝流派亂互得通稱是以春秋昭公九年遷城父人於陳以夷澗西田益之京相璠曰以夷之澗西田益也杜預亦言以夷田在澗水西者與城父人服虔曰澗水名也且字類音同津瀾邈別不得為北澗上源師氏傳音於其上矣。澗水又南逕鍾亭西又南逕皇

亭又東南逕關亭西又東南逕宛亭西鄭大夫宛射犬之故邑也澗水又南分為二水一水南出逕胡城東故潁陰縣之狐人亭也其水南結為陂謂之胡城陂澗水自枝渠東逕曲強城東皇陂水注之水出西北皇臺七女岡北皇陂即古長社縣之濁澤也史記魏惠王元年韓懿侯與趙成侯合軍伐魏戰于濁澤是也。方輿紀要云濁澤括地志云出解縣東北平地即涿水涿音濁史記趙成侯六年伐魏取涿澤魏世家魏惠王元年韓懿侯趙成侯合兵伐魏戰于濁澤大破之遂圍魏是時魏都安邑或以為河南之濁澤誤也一清按史記韓世家注云徐廣曰長社有濁澤其陂水寰宇記尉氏縣下引水經注云鄴說蓋有所據魏惠王元年韓懿侯會伐魏于皇澤陂北對雞鳴城一清北對雞鳴城即長社縣之濁按其陂水下疑有脫誤

城也陂水東南流逕胡泉城北故潁陰縣之狐宗鄉也  
 又東合胡城陂水水上承皇陂水而東南流注于黃水  
 謂之合作口而東逕曲強城北東流入淇水時入謂之  
 勅水非也勅淇音相類故字從聲變耳一清按說文淇水出河南密縣  
 大隗山南入潁从水異聲與職切與水經合又有淇水  
 出河南密縣東入潁从水翼聲與職切與水經合而有淇水  
 相近其源委又同豈即一水而重出者與惟其  
 為與職切故與勅音相類若讀作異相去遠矣淇水又  
 逕東西二武亭間兩城相對疑即古之岑門史遷所謂  
 走犀首于岑門者也徐廣曰潁陰有岑亭未知是否沈氏  
 日續志潁陰縣有岸門史記魏世家哀王五年走犀首  
 于岸門徐廣曰潁陰有岸亭張守節曰括地志云岸門  
 在長社縣西北二十八里今名西武亭然則岑字誤也  
 索隱引劉昭曰河東皮氏縣有岸頭亭蓋為謬矣一清

按漢書衛青傳張次公封岸頭侯晉灼曰河東皮氏亭  
 也顧景范曰岸頭亭在河津縣南古岸門也史記秦孝  
 公二十四年與晉戰于岸門虜其將魏錯又惠文王後  
 十一年敗韓于岸門斬首十萬魏世家襄王五年秦使  
 樗里子伐取我曲沃走犀首于岸門今河津漢  
 皮氏縣地與曲沃近河東亦有岸門因致斯誤淇水又  
 南逕射犬城東即鄭公孫射犬城也蓋俗謬耳淇水又  
 南逕潁陰縣故城西魏明帝封司空陳羣為侯國其水  
 自城西又東逕許昌城南又東南與宣梁陂水合陂水  
 上承狼陂於潁陰城西南陂南北二十里東西十里春  
 秋左傳曰楚子伐鄭師于狼淵是也其水東南入許昌  
 縣逕巨陵城北鄭地也春秋左氏傳莊公十四年鄭厲  
 公獲傅瑕于大陵京相璠曰潁川臨潁縣東北二十五

里有故巨陵亭古大陵也其水又東積而為陂謂之宣梁陂也陂水又東南入淇水淇水又西南流逕陶城西又東南逕陶陂東

東南入于潁


澮水出鄭縣西北平地

全氏曰按澮水說文以出桂陽臨武者當之而水經注汝水篇亦有出平輿之澮水若其出鄭縣者說文以為澮水其音如澮其字不作澮也不知何時盡毛詩外傳國語孟子史漢諸書之澮胥改為澮猶幸水經存其舊稍留說文之學

澮水出鄆城西北雞絡塢下東南流逕賈復城西東南流左合澮水水出賈復城東南流注于澮澮水又南左會承雲山水水出西北承雲山東南歷渾子岡東注世

謂岡峽為五鳴口東南流注于澮澮水又東南流歷下田川逕鄆城西謂之為柳泉水也故史伯答桓公曰君以成周之衆奉辭伐罪若尅虢鄆君之土也如前華後河右洛左濟主茅騶而食澮洧修典刑以守之可以少固即謂此矣澮水又南懸流奔壑崩注丈餘其下積水成潭廣四十許步淵深難測又南注于洧全氏曰按澮道元已詳辨之則此注洧之說疑衍文詩所謂澮與洧者也世亦謂之為鄆水也春秋分記曰鄭之澮水故會國居之亦曰澮水是也東過其縣北又東南過其縣東又南入于洧水

自鄆澮東南更無別瀆不得逕新鄭而會洧也鄭城東



入洧者黃崖水也蓋經誤證耳一清按此條又不錯則知上注必無注洧之說

渠出滎陽北河東南過中牟縣之北  
風俗通曰渠者水所居也渠水自河與洧亂流東逕滎  
澤北東南分洧歷中牟縣之圃田澤北與陽武分水澤  
多麻黃草故述征記曰踐縣境便覩斯卉窮則知踰界  
今雖不能然諒亦非謬詩所謂東有圃草也皇武子曰  
鄭之有原圃猶秦之有具囿澤在中牟縣西西限長城  
東極官渡北佩渠水東西四十許里南北二百許里中  
有沙岡上下二十四浦津流逕通淵潭相接各有名焉  
有大斬小斬大灰小灰義魯練秋大白楊小白楊散嚇

禺中羊圈大鵠小鵠龍澤密羅大哀小哀大長小長大  
縮小縮伯邱大蓋牛眠等浦水盛則北注渠溢則南播  
故竹書紀年梁惠成王十年入河水于甫田又為大溝  
而引甫水者也又有一瀆自酸棗受河導自漢瀆歷酸  
棗逕陽武縣南出世謂之十字溝而屬於渠或謂是瀆  
為梁惠之年所開而不能詳也斯浦乃水澤之所鍾為  
鄭陘之淵藪矣渠水右合五池溝上承澤水下流入渠  
謂之五池口魏嘉平三年司馬懿帥中軍討太尉王凌  
於壽春自彼而還帝使侍中韋誕勞軍於五池者也今  
其地為五池鄉矣渠水又東不家溝水注之水出京縣

東南梅山北谿春秋襄公十八年楚為子馮公子格率  
鏡師侵費右迴梅山杜預曰在密東北卽是山也其水  
自谿東北流逕管城西故管國也周武以封管叔矣成  
王幼弱周公攝政管叔流言曰公將不利于孺子公賦  
鴟鴞以伐之卽東山之詩是也左傳宣公十二年晉師  
救鄭楚次管以待之杜預曰京縣東北有管城者是也  
俗謂之爲管水又東北分爲二水一水東北流注黃雀  
溝謂之黃淵淵周一百步其一水東越長城東北流水  
積爲淵南北二里東西百步謂之百尺水北入圃田澤  
分爲二水一水東北逕東武強城北漢書曹參傳擊

羽嬰于昆陽追至葉還攻武強因至滎陽薛瓚云按武  
強城在陽武縣卽斯城也漢高帝六年封騎將莊不識  
爲侯國又東北流左注于渠爲不家水口也一水東流  
又屈而南轉東南注白溝也渠水又東清池水注之清  
池水出清陽亭西南平地東北流逕清陽亭南東流卽  
故清人城也詩所謂清人在彭彭爲高克邑也故杜預  
春秋釋地云中牟縣西有清陽亭是也清池水又屈而  
北流至清口澤七虎澗水注之水出華城南岡一源兩  
派津川趣別西入黃雀溝東爲七虎谿亦謂之爲華水  
也又東北流紫光溝水注之水出華陽城東北而東流

俗名曰紫光湖又東北注華水華水又東逕棗城北卽北林亭也春秋文公與鄭伯宴于棗林子家賦鴻雁者也春秋宣公元年諸侯會于棗林以伐鄭楚救鄭遇于北林服虔曰北林鄭南地也京相璠曰今滎陽苑陵縣有故林鄉在新鄭北故曰北林也余按林鄉故城在新鄭東北如北七十許里苑陵故城在東南五十許里不得在新鄭北也考京服之說竝爲疎矣杜預云滎陽中牟縣西南有林亭在鄭北今是亭南去新鄭縣故城四十許里蓋以南有林鄉亭故杜預據是爲北林最爲密矣又以林鄉爲棗亦或疑焉諸侯會棗楚遇于此寧得

知不在是而更指他處也積古之傳事或不謬矣又東北逕鹿臺南岡北出爲七虎澗東流期水注之水出期城西北平地世號龍澗水東北流又北逕期城西又北與七虎澗合謂之虎谿水亂流東注逕期城北東會清口水司馬彪郡國志曰中牟有清口水卽是水也清水又東北白溝水注之水有二源北水出密之梅山東南而東逕靖城南與南水合南水屈合太水西北流至靖城南左注北水卽承水也山海經曰承水出太山之陰東北流注于役水者也世謂之靖澗水也又東北流太水注之水出太山東平地山海經曰太水出于太山之

陽而東南流注于役水世謂之禮水也東北逕武陵城西東北流注于承水又東北入黃龔湖北逕中陽城西城內有舊臺甚秀臺側有陂池池水清深澗水又東屈逕其城北竹書紀年梁惠成王十七年鄭釐侯來朝中陽者也其水東北流為白溝又東北逕伯禽城北蓋伯禽之魯往逕所由也屈而南流東注于清水即潘岳都鄉碑所謂自中牟故縣以西西至于清溝指是水也亂流東逕中牟宰魯恭祠南漢和帝時右扶風魯恭字仲康以太尉掾遷中牟令政專德化不任剗罰吏民敬信惶不入境河南尹袁安疑不實使部掾肥親按行之恭

隨親行阡陌坐桑樹下雉止其傍有小兒親曰兒何不擊雉曰將雛親起曰蟲不入境一異化及鳥獸二異豎子懷仁三異久留非優賢請還是年嘉禾生縣庭安美其治以狀上之徵博士侍中車駕每出恭常陪乘上顧問民政無所隱諱故能遺愛自古祠饗來今矣清溝水又東北逕沈清一清按沈清下疑脫亭字疑即博浪亭也服虔曰博浪陽武沙水二名也今有亭一清按漢書張良傳注引地名今有亭史記索隱曰服虔云博浪地名在陽武南而晉志滎陽郡卷縣下云有博浪長沙道元既以博浪為澤水所鍾又是長沙故云沙水二名但所引服說全與史漢注異未知所據所未詳也歷博浪澤昔張良為韓報仇於秦以金椎擊秦始皇不中中



其副車於此又北分爲二水枝津東注役水清水自枝  
 流北注渠謂之清溝口渠水又左逕陽武縣故城南東  
 爲官渡水又逕曹太祖壘北有高臺謂之官渡臺渡在  
 中牟故世又謂之中牟臺建安五年太祖營官渡袁紹  
 保陽武紹連營稍前依沙堆爲屯東西數十里公亦分  
 營相禦合戰不利紹進臨官渡起土山地道以逼壘公  
 亦起高臺以捍之即中牟臺也今臺北土山猶在山之  
 東悉紹舊營遺基竝存渠水又東逕田豐祠北袁本初  
 慙不納其言害之時人嘉其誠謀無辜見戮故立祠於  
 是用表袁氏覆滅之宜矣又東役水注之水出苑陵縣

西隰侯亭東世謂此亭爲郟城非也蓋隰郟聲相近耳

沈氏曰左傳襄公十一年諸侯之師次于瑣杜註苑陵縣西有瑣侯亭續志苑陵縣有瑣侯亭若隰是隰字不與瑣通考字書瑣與瑣通或是瑣字之誤文 中平陂一清按中平陂上有脫文 世名之渚

泉也即古役水矣山海經曰役山役水所出北流注于

河疑是水也東北流逕苑陵縣故城北東北流逕焦城

東陽邱亭西世謂之焦溝水竹書紀年梁惠成王十六

年秦公孫壯率師伐鄭圍焦城不克即此城也俗謂之

驛城非也役水自陽邱亭東流逕山氏城北爲高榆淵

竹書紀年梁惠成王十六年秦公孫壯率師城上枳安陵

山氏者也又東北爲酢溝又東北魯溝水出焉役水又

東北堽溝水出焉又東北爲八丈溝又東清水枝津注之水自沈城東派注于役水又東逕曹公壘南東與沫水合山海經云末山沫水所出北流注于役今是水出中牟城西南疑卽沫水也東北流逕中牟縣故城南昔趙獻侯自耿都此班固云趙自邯鄲徙焉趙襄子時佛肸以中牟叛置鼎於庭不與已者烹之田英朱氏謀瑋箋曰說苑作田基新將褰裳赴鼎處也薛瓚注漢書云中牟在春秋之時爲鄭之疆也及三卿分晉則在魏之邦土趙自漳北不及此也春秋傳曰衛侯如晉過中牟非衛適晉之次也汲郡古文曰齊師伐趙東鄙圍中牟此中牟不

在趙之東也按中牟當在濕水之北矣按春秋齊伐晉夷儀晉車千乘在中牟衛侯過中牟中牟人欲伐之衛褚師固亡在中牟曰衛雖小其君在未可勝也齊師尅城而驕遇之必敗乃敗齊師服虔不列中牟所在杜預曰今滎陽有中牟迴遠疑爲非也然地理參差土無常域隨其強弱自相吞併疆理畱移寧可一也兵車所指逕紆難知自魏徙大梁趙以中牟易魏故趙之南界極于浮水匪直專漳也趙自西取後止中牟齊師伐其東鄙于宜無嫌而瓚但逕濕水空言中牟所在非論證也

全氏曰有河南之中牟有河北之中牟張守節以鄴西牟山爲趙中牟者近之管子所謂築五鹿中牟鄴者三

城相接也然則非獨滎陽有之矣一清按春秋定九年傳晉車千乘在中牟杜預曰今滎陽有中牟縣迴遠疑非也孔穎達正義曰此中牟在晉境內也趙世家云獻侯即位治中牟漢書地理志云河南郡有中牟縣趙獻侯自耿徙此又云三家分晉河南之中牟魏分也杜言今滎陽有中牟縣謂此河南之中牟也晉世分河南為滎陽郡中牟屬焉此地乃在河南計非晉竟故云迴遠疑非也又三家分晉中牟屬魏則非趙得都之趙獻侯治中牟亦非河南之中牟也此言晉車在中牟哀五年趙鞅伐衛圍中牟論語佛胥為中牟宰與趙獻侯所都或別是一地必非河南中牟當于河北別有中牟但不復知其處耳有臣瓚者不知其姓或云姓傅作漢書音義云臣瓚案河南中牟春秋之時在鄭之疆內及三卿分晉則為魏之邦上趙界自漳水以北不及此也春秋衛侯如晉過中牟案此中牟非衛適晉之次也汲郡古文曰齊師伐趙東鄙圍中牟此中牟不在趙之東也案中牟當在溫水之上瓚言河南中牟非此中牟誠如其語謂此中牟當在溫水之上不知其所案據也溫水宜是濟潔之潔此為文誤方輿紀要中牟城漢高帝十一在湯陰縣西五十里此即河北之中牟也

年封單父聖為侯國

一清按漢表作單右車此從史表

沫水又東北注

于役水昔魏太祖之背董卓也問行出中牟為亭長所

錄郭長公世語為縣所拘

一清按九字注中注

功曹請釋焉役水

又東北逕中牟澤即鄭太叔攻荏蒲之盜于是澤也其

水東流北屈注渠水續述征記所謂自醬魁城到酢溝

十里者也渠水又東流而左會淵水其水上承聖女陂

陂周二百餘步水無耗竭湛然清滿而南流注于渠渠

水又東南而注大梁也

又東至浚儀縣

渠水東南逕赤城北戴延之所謂西北有大梁亭非也

竹書紀年梁惠成王二十八年穰苴朱氏謀埠箋曰率今竹書作穰疵

師及鄭孔夜戰于梁赫鄭師敗逋即此城也左則故瀆

出焉秦始皇二十年王賁斷故渠引水東南出以灌大

梁謂之梁溝又東逕大梁城南本春秋之陽武高陽鄉

也于戰國為大梁周梁伯之居矣梁伯好土功大其城

號曰新里民疲而潰秦遂取焉後魏惠王自安邑徙都

之故曰梁耳竹書紀年梁惠成王六年四月甲寅徙都

于大梁是也日知錄曰左傳桓九年梁伯伐曲沃註梁國在馮翊夏陽縣卻芮曰梁近秦而幸焉

是也漢書地理志云馮翊夏陽故少梁也水經注乃誤以少梁為大梁而不知大梁不近秦也後漢志河南尹

梁故國伯翳後註引博物記云梁伯好土功今梁多有城亦誤全氏曰少梁左傳文十年晉所取秦邑也漢志

河南郡梁縣臣瓚曰此梁周之小邑見于春秋蓋即指楚人侵梁及霍之梁在戰國為南梁蓋大梁在浚儀少梁在夏陽南梁在汝水之傍三梁不可混也

秦滅魏以為縣漢文帝封孝王

于梁孝王以土地下溼東都睢陽又改曰梁自是置縣

以大梁城廣居其東城夷門之東夷門即侯嬴抱關處

也續述征記以此城為師曠城言郭緣生曾遊此邑踐


夷門升吹臺終古之跡緬焉盡在余謂此乃梁氏之臺

門魏惠之朝居非吹臺也當是誤證耳西征記論儀

封人即此縣又非也竹書紀年梁惠成王三十一年三

月為大溝于北郭以行圃田之水陳畱風俗傳曰縣北

有浚水像而儀之故曰浚儀余謂故汴沙為陰溝矣浚



之故曰浚其猶春秋之浚洙乎漢氏之浚儀水無佗也  
 皆變名矣一清按顧景范曰詩爰有寒泉在浚之下志云今祥符縣西三十里有寒泉陂即詩所稱浚水為汴所奪故汴水經大梁北亦兼浚水之名蓋不始於漢氏也浚城寒泉岡亦見瓠子注其國多池沼時池中出神劍到今其民像而作之號大梁氏之劍也渠水又北屈分為二水續述征記曰汴沙到浚儀而分也汴東注沙南流其水東南流逕梁王吹臺東陳畱風俗傳曰縣有倉頡師曠城上有列仙之吹臺北有牧澤中出蘭蒲土多儻髦衿帶牧澤方一十五里俗謂之蒲關澤即謂此矣梁王增築以為吹臺城隍夷滅略存故迹今層臺孤立於牧澤之右矣其臺方一百許步

即阮嗣宗詠懷詩所謂駕言發魏都南向望吹臺簫管有遺音梁王安在哉晉世喪亂乞活憑居削隳故基遂成二層上基猶方四五十步高一丈餘世謂之乞活臺又謂之婆臺城一清按文昌雜錄繁臺梁孝王按歌吹繁婆音相近即婆臺也日知錄建昭三年七月戊辰衛府李延壽為御史大夫一姓繁師古曰繁音滿元反陳湯傳御史大夫繁延壽師古曰繁音滿胡反蕭望之傳師古音蒲谷永傳師古音蒲何反蒲元則音盤蒲胡則音蒲蒲何則音婆三音互見竝未歸一然繁字似有蒲音左傳定四年殷民七族繁音步何反儀禮鄉射禮注今文皮樹為繁豎皮古音婆史記張丞相世家丞司直繁君索隱曰繁音婆文選繁休伯呂向音步何反則繁之音婆相傳久矣渠水于此有陰溝鴻溝之稱焉項羽與漢高  
 分王指是水以為東西之別故蘇秦說魏襄王曰大王

之地南有鴻溝是也故尉氏縣有波鄉波亭鴻溝鄉鴻溝亭皆藉水以立稱也今蕭縣西亦有鴻溝亭梁國睢陽縣東有鴻口亭先後談者亦指此以為楚漢之分王非也蓋春秋之所謂紅澤者矣一清按善長之辨非楚漢分畫之鴻溝是矣其言春秋之紅澤則非也說見獲水注中渠水右與汜水合水上承役水于苑陵縣縣故鄭都也王莽之左亭縣也役水枝津東派為汜水者也而世俗謂之堽溝水也春秋左傳僖公三十年晉侯秦伯圍鄭晉軍函陵秦軍汜南所謂東汜者也其水又東北逕中牟縣南又東北逕中牟澤一清按漢志河南郡中牟縣下云圃田澤在西豫州藪即是澤也與淵水合水出中牟縣故城

北城有層臺按郭頒世語及干寶晉紀竝言中牟縣故魏任城王臺下池中有漢時鐵錐長六尺入地三尺頭西南指不可動至月朔自正以為晉氏中興之瑞而今不知所在或言在中陽城池臺未知焉是淵水自池西出屈逕其城西而東南流注于汜汜水又東逕大梁亭南又東逕梁臺南東注渠渠水又東南流逕開封縣睢渙二水出焉右則新溝水注之其水出逢池一清按漢志河南郡開封縣下云逢池在東北或曰宋之逢澤也臣瓚曰汲郡古文梁惠王發逢忌之藪以賜民今浚儀有逢陂忌澤是也池上承役水于苑陵縣別為魯溝水東南流逕開封縣故城北漢高帝十一年封陶舍為侯國也陳畱志

稱阮簡字茂宏為開封令縣側有劫賊外白甚急數阮方圍棋長嘯吏云劫急阮曰局上有劫亦甚急其耽樂如是故語林曰王中郎以圍棋為坐隱或亦謂之為手談又謂之為棋聖魯溝南際富城東南入百尺陂即古之逢澤也徐廣史記音義曰秦孝公會諸侯于逢澤陂汲郡墓竹書紀年作逢澤一清按史記秦本紀孝公二十年會諸侯逢澤徐廣曰開封東北有逢澤不如酈所云斯其處也故應德璉西征賦曰鸞衡東指弭節逢澤其水東北流為新溝新溝又東北流逕牛首鄉北謂之牛建城又東北注渠即沙水也音蔡許慎正作沙音言水散石也從水少水沙見矣一清按二十字注中注

楚東有沙水謂此水也

又屈南至扶溝縣北

沙水又東南逕牛首鄉東南魯溝水出焉亦謂之宋溝也又逕陳畱縣故城南孟康曰畱鄭邑也後為陳所并故曰陳畱矣魯溝水又東南逕圍縣故城北縣苦楚難修其于戈以圍其患故曰圍也或曰邊陲之號矣歷萬人散王莽之篡也東郡太守翟義興兵討莽莽遣奮威將軍孫建擊之于圍北義師大敗尸積萬數血流溢道號其處為萬人散百姓哀而祠之一清按郡國志圍有高陽亭劉昭補註引陳畱志云有萬人聚王邑破翟義積尸處今高陽文穎曰高陽聚邑名又歷魯溝亭又東

南至陽夏縣故城西漢高祖六年封陳豨為侯國魯溝  
 水又南入渦一清按漢志陳留郡陳留縣魯渠水首受  
 狼蕩渠東至陽夏入渦正國語所謂商魯  
 溝今無水也沙水又東南逕斗城西左傳襄公三十年  
 子產殯伯有尸其臣葬之於是城也沙水又東南逕牛  
 首亭東左傳桓公十四年宋人與諸侯伐鄭東郊取牛  
 首者也俗謂之車牛城矣沙水又東南八里溝水出焉  
 又東南逕陳留縣裴氏鄉裴氏亭西又逕澹臺子羽冢  
 東與八里溝合按陳留風俗傳曰陳留縣裴氏鄉有澹  
 臺子羽冢又有子羽祠民祈禱焉京相璠曰今泰山南  
 武城縣有澹臺子羽冢縣人也不知孰是因其方誌所

敘就記纏絡焉溝水上承沙河而西南流逕牛首亭南  
 與百尺陂水合其水自陂南逕開封城東三里岡左屈  
 而西流南轉注八里溝又南得野兔水口水上承西南  
 兔氏亭北野兔陂鄭地也春秋傳云鄭伯勞屈生于兔  
 氏者也陂水東北入八里溝八里溝水又南逕石倉城  
 西又南逕兔氏亭東又南逕召陵亭西東入沙水沙水  
 南逕扶溝縣故城東縣即潁川之穀平鄉也有扶亭又  
 有洧水溝故縣有扶溝之名焉建武元年漢光武封平  
 狄將軍朱鮪為侯國沙水又東與康溝水合水首受洧  
 水於長社縣東東北逕向岡西即鄭之向鄉也後人過



其上口今水盛則北注水耗則輟流又西長明溝水注之水出苑陵縣故城西北縣有二城此則西城也二城以東悉多陂澤即古制澤也京相璠曰鄭地杜預曰澤在滎陽苑陵縣東即春秋之制田也故城西北平地出泉謂之龍淵泉淵水流逕陵邱亭西又西重泉水注之水出城西北平地泉湧南流逕陵邱亭西西南注龍淵水龍淵水又東南逕凡陽亭西而南入白雁陂陂在長社縣東北東西七里南北十里在林鄉之西南司馬彪郡國志曰苑陵有林鄉亭一清按今續志無是文劉昭補註于苑陵縣下引杜預曰縣東南有林鄉白雁陂又引瀆南流謂之長明溝東轉北屈又

東逕向城北城側有向岡左傳襄公十一年諸侯伐鄭師于向者也又東右迤為染工陂而東注于蔡澤陂長明溝水又東逕尉氏縣故城南圜稱云尉氏鄭國之東鄙弊獄官名也鄭大夫尉氏之邑故欒盈曰盈將歸死于尉氏也全氏曰欒孺子所對周尉氏之官也善長以此證鄭尉氏之邑則誤矣溝瀆自是三分北分為康溝東逕平陸縣故城北高后元年封楚元王子禮為侯國全氏曰按本表是景帝所封索隱云西河又云東平陸在東平胡三省曰東平近楚為得之建武元年以戶不滿三千罷為尉氏縣之陵樹鄉又有陵樹亭漢建安中封尚書荀攸為陵樹鄉侯故陳畱風俗傳曰陵樹鄉故平陸縣也一清按漢志陳畱郡無平

陸縣也劉昭續志補註于尉氏縣下引陳畱志云有陵樹鄉則東京廢省之說有如酈言抑或班固之失記耳北有大澤名曰長樂廢一清按劉昭補註尉氏縣下引陳畱志曰北有大澤澤有天子苑有長樂廢漢諸帝以馴養猛獸然則廢非澤名善長誤矣康溝水又東逕扶溝縣之白亭北陳畱風俗傳曰扶溝縣有帛鄉帛亭名在七鄉十二亭中康溝水又東逕少曲亭陳畱風俗傳曰尉氏縣有少曲亭俗謂之為小城也又東南逕扶溝縣故城東而東南注沙水沙水又南會南水其水南流又分為二水一水南合關亭東又東南流與左水合其水自枝瀆南逕召陵亭西疑即扶溝之亭也而東南合右水世以是水與僞陵陂水雙導亦謂之雙溝又東南入沙

水沙水南與蔡澤陂水合水出僞陵城西北春秋成公十六年晉楚相遇于僞陵呂錡射中共王目王召養由基使射殺之亦子反醉酒自斃處也陂東西五里南北十里陂水東逕匡城北城在新汲縣之東北即扶溝之匡亭也亭在匡城鄉春秋文公元年諸侯朝晉衛成公不朝使孔達侵鄭伐縣訾及匡即此邑也今陳畱長垣縣南有匡城即平邱之匡亭也襄邑又有承匡城然匡居陳衛之間亦往往有異邑矣陂水又東南至扶溝城北又東南入沙水沙水又南逕小扶城西南流也城即扶溝縣之平周亭東漢和帝永元中封陳敬王子參為

侯國沙水又東南逕大扶城西城卽扶鄉故縣也城北

二里有袁梁碑云梁陳國扶樂人隸釋漢國三老袁君碑云君諱良字厚卿

陳國扶樂人也洪氏适曰碑在開封之扶溝袁君名良歷郎中謁者將作大匠丞相令史廣陵太守議郎符節

令國三老梁相以順帝永建六年卒其孫衛尉滂立此石滂以光和年爲相其作九卿當在靈帝之初水經云

扶溝有袁梁碑者誤也一清按袁君名良碑字足據無可疑者酈注作梁良梁音同互用左傳季梁潰水注作

季良亦其類也後漢世祖建武十七年更封劉隆爲扶樂侯卽

此城也渦水於是分焉不得在扶溝北便分爲二水也

其一者東南過陳縣也

沙水又東南逕東華城西又東南沙水枝瀆西南達洧

謂之甲庚溝今無水沙水又南與廣漕渠合上承龐官

陂云鄧艾所開也雖水流廢興溝瀆尚夥昔賈逵爲魏

豫州刺史通運渠二百里餘亦所謂賈侯渠也而川渠

逕復交錯畛陌無以辨之沙水又東逕長平縣故城北

又東南逕陳城北故陳國也伏羲神農竝都之城東北

三十許里猶有羲神實中舜後媯滿爲周陶正武王賴

其器用妻以元女太姬而封諸陳以備三恪太姬好祭

祀故詩所謂坎其擊鼓宛邱之下宛邱在陳城南道東

王隱云漸欲平今不知所在矣楚討陳殺夏徵舒於栗

門以爲夏州後一清按此下有缺文蓋敘楚莊王因申

爲夏州則尚有不合者左氏傳曰因縣陳又曰乃復封陳鄉取一人焉以歸謂之夏州孔氏正義曰謂之夏州

者討夏氏鄉取一人以歸楚而成一州城之東門內有故謂之夏州蓋未嘗以陳為夏州也

池池水東西七十步南北八十許步水至清潔而不耗

竭不生魚草水中有故臺處詩所謂東門之池也城內

有漢相王君造四縣邸碑文字剝落不可悉識其略曰

唯茲陳國故曰淮陽郡云云一清按漢志淮陽是國名不知此碑何以有郡稱也

王君清惠著聞為百姓畏愛求賢養士千有餘人賜與

田宅吏舍自損俸錢助之成邸五官掾西華陳騏等二

百五人以延熹二年云云故其頌曰修德立功四縣回

附今碑之左右遺塘尚存基礎猶在時人不復尋其碑

證云孔子廟學非也後楚襄王為秦所滅徙都於此文

穎曰西楚矣三楚斯其一焉城南郭裏又有一城名曰

淮陽城子產所置也漢高祖十一年以為淮陽國王莽

更名新平縣曰陳陵故豫州治王隱晉書地道記云城

北有故沙名之為死沙而今水流津通漕運所由矣沙

水又東而南屈逕陳城東謂之百尺溝又南分為二水

新水出焉溝水東南流谷水注之水源上承滂陂陂在

陳城西北南暨犖城皆為陂矣陂水東流謂之谷水東

逕犖城北王隱曰犖北有谷水是也犖即檉矣經書公

會齊宋于檉者也杜預曰檉即犖也在陳縣西北為非

檉小城也在陳郡西南谷水又東流逕陳城南又東流

入于沙沙水又東南流注于潁謂之交口水次有大堰  
即古百尺堰也魏書國志曰司馬宣王討太尉王凌大  
軍掩至百尺場即此場也今俗呼之為山陽堰非也蓋  
新水首受潁於百尺溝王莽名郡為新平一清按此文  
與上複出  
故堰兼有新陽之名也以是推之悟故俗謂之非矣

又東南至汝南新陽縣北

沙水自百尺溝東逕寧平縣之故城南晉陽秋稱晉太  
傅東海王越之東奔也石勒追之殯尸於此數十萬衆  
斂手受害勒縱騎圍射尸積如山王夷甫死焉余謂俊  
者所以智勝羣情辨者所以文身祛惑夷甫雖體荷雋

令曰擅雌黃汙辱君親獲罪羯勒史官方之華王諒為  
褒矣沙水又東積而為陂謂之陽都陂明水注之水上  
承沙水枝津東出逕汝南郡之宜祿縣故城北王莽之  
賞都亭也明水又東北流注于陂陂水東南流謂之細  
水又東逕新陽縣北又東高陂水東出焉沙水又東分  
為二水即春秋所謂夷濮之水也一清按春秋無夷濮  
之水之名杜預曰此  
時改城父為夷又云夷田在濮水  
西道元所引前後殆自相伐也枝津北逕譙縣故城  
西側城入渦沙水東南逕城父縣西南枝津出焉俗謂  
之漳水也一水東注即濮水也俗謂之父水也東逕城  
父縣之故城東南流注之

又東南過山桑縣北

山桑故城在渦水北沙水不得逕其北明矣經言過北  
誤也

又東南過龍亢縣南

沙水逕故城北又東南逕白鹿城北而東注也

又東南過義城縣西南入于淮

義城縣故屬沛後隸九江沙水東流注于淮謂之沙汭  
京相璠曰楚東地也春秋左傳昭公二十七年楚令尹  
子常以舟師及沙汭而還杜預曰沙水名也

水經注釋卷二十二終

水經注釋卷二十三

仁和趙一清誠夫錄

陰溝水 坂水 獲水

陰溝水出河南陽武縣蕩蕩渠

陰溝首受大河於卷縣故瀆東南逕卷縣故城南又東  
逕蒙城北史記秦莊襄王元年蒙驁擊取成臯滎陽初  
置三川郡疑卽驁所築也于事未詳故瀆東分爲二世  
謂之陰溝水京相璠以爲出河之濟又非所究俱東絕  
濟隧右瀆東南逕陽武城北又東南絕長城逕安亭北  
又東北會左瀆左瀆又東絕長城逕垣雍城南昔晉文

公戰勝于楚周襄王勞之于此故春秋書甲午至于衡  
 雍作王宮于踐土呂氏春秋曰尊天子于衡雖者也郡  
 國志曰卷縣有垣離城卽史記所謂韓獻秦垣離是也  
 又東逕開光亭南又東逕清陽亭南又東合右瀆又東  
 南逕封邱縣絕濟瀆東南至大梁合蕩蕩渠梁溝既開  
 蕩蕩渠故瀆實兼陰溝浚儀之稱故云出陽武逕大梁  
 城北左屈與梁溝合俱東南流同受鴻溝沙水之目其  
 川流之會左瀆東導者卽汜水也蓋津源之變名矣故  
 經云陰溝出蕩蕩渠者也

東南至沛爲過水

陰溝始亂蕩蕩終別於沙而過水出焉過水受沙水於  
 扶溝縣爾雅曰過爲洵郭景純曰大水溢出別爲小水  
 也呂忱曰洵過水也過水逕大扶城西城之東北悉諸  
 袁舊墓碑字傾低羊虎碎折唯司徒滂蜀郡太守騰博  
 平令光碑字所存唯此自餘殆不可尋過水又東南逕  
 陽夏縣西又東逕邈城北城實中而西有礫郭過水又  
 東逕大棘城南故鄢之大棘鄉也春秋宣公二年宋華  
 元與鄭公子歸生戰于大棘獲華元左傳曰華元殺羊  
 食士其御羊斟不與及戰曰疇昔之羊子爲政今日之  
 事我爲政遂御入鄭故見獲焉後其地爲楚所并故圈

稱曰大棘楚地有楚太子建之墳及伍員釣臺池沼具存過水又東逕安平縣故城北陳畱風俗傳曰大棘鄉故安平縣也士人敦養易以統御過水又東逕鹿邑城北世謂之虎鄉城非也春秋之鳴鹿矣杜預曰陳國武平西南有鹿邑亭是也城南十里有晉中散大夫胡均碑元康八年立過水之北有漢溫令許續碑續字嗣公陳國人也舉賢良拜議郎遷溫令延熹中立過水又東逕武平縣故城北城之西南七里許有漢尚書令虞詡碑碑題云虞君之碑諱詡字定安虞仲之後爲朝歌令武都太守文字多缺不復可尋按范氏漢書詡字升卿

陳國武平人祖爲縣獄吏治存寬恕嘗曰于公爲里門子爲丞相吾雖不及于公子孫未必不爲九卿故字詡曰升卿定安蓋其幼字也魏武王初封於此終以武平華夏矣過水又東逕廣鄉城北圈稱曰襄邑有蛇邱亭故廣鄉矣改曰廣世後漢順帝陽嘉四年封侍中摯填爲侯國卽廣鄉也過水又東逕苦縣西南分爲二水枝流注於東北賴城入谷爲死過也過水又東南屈逕苦縣故城南郡國志曰春秋之相也王莽更名之曰賴陵矣城之四門列築馳道東起賴鄉南自南門越水直指故臺西面南門列道徑趣廣鄉道西門馳道西屈武平



北門馳道暨于北臺過水又東北屈至賴鄉西谷水注之谷水首受渙水於襄邑縣東東逕承匡城東春秋經書夏叔彭生會晉卻缺于承匡左傳曰謀諸侯之從楚也全氏祖望曰傳文是謀諸侯之從楚者今鈔變作也字則其義乖矣京相璠曰今陳畱襄邑西三十里有故承匡城谷水又東南逕已吾縣故城西陳畱風俗傳曰縣故宋地雜以陳楚之地故梁國寧陵縣之徙種龍鄉也以成哀之世戶至八九千冠帶之徒求置縣矣永元十一年陳王削地以大棘鄉直陽鄉十二年自隲隸之命以嘉名曰已吾猶有陳楚之俗焉谷水又東逕柘縣故城東地理志淮陽之屬縣也城

內有柘令許君清德頌石碎字紊唯此文見碑城西南里許有漢陽臺令許叔種碑光和中立又有漢故樂成陵令太尉掾許嬰碑嬰字虞卿司隸校尉之子建寧元年立餘碑文字碎滅不復可觀當似司隸諸碑也谷水又東逕苦縣故城中水泛則四周隍塹耗則孤津獨逝谷水又東逕賴鄉城南其城實中東北隅有臺偏高俗以是臺在谷水北其城又謂之谷陽臺非也谷水自此東入澗水澗水又北逕老子廟東廟前有二碑在南門

外漢桓帝遣宦官管霸祠老子命陳相邊韶撰碑隸釋云老子銘篆額在亳州苦縣苦屬陳國故其文陳相邊韶所作碑云延熹八年八月帝夢老子尊而祀之帝紀此年

春冬兩遣中常侍至苦祠老子水經載蒙城王子喬碑亦云延熹八年八月帝遣使致祠國相王璋乃銘紀遺烈蓋威宗方修神仙之事故一時郡國竝作碑表此石立于延熹無疑杜子美云苦縣光和尚骨立誤也一清按注無立碑年月碑云延熹八年八月甲子日是也北有雙石闕甚整頓石闕南側魏文帝黃初三年逕譙所勒闕北東側有孔子廟廟前有一碑西面是陳相魯國孔疇建和三年立北則老君廟廟東院中有九井焉又北過水之側又有李母廟廟在老子廟北廟前有李母冢冢東有碑是永興元年譙令長沙王阜所立碑云老子生于曲澗一清按晉書地道記云曲仁里老子也許慎又云過水首受淮陽扶溝縣蕩蕩渠不得至沛方為過水也全氏曰此二十五字疑是注首扶溝縣下之錯簡今次于此是不比

也過水又屈東逕相縣故城南其城卑小實中邊韶老子碑又云老子楚相縣人也相縣虛荒今屬苦故城猶存在賴游鄉之東過水處其陽疑卽此城也自是無郭以應之過水又東逕譙縣故城北春秋左傳僖公二十三年楚成得臣帥師伐陳遂取譙城頓而還是也王莽之延成亭也魏立譙郡沅州治沙水自南枝分北逕譙城西而北注過過水四周城側城南有曹嵩冢冢北有碑碑北有廟堂餘基尚存柱礎仍在廟北有二石闕雙峙高一丈六尺椽櫺及柱皆雕鏤雲炬上孳愚已碎闕北有圭碑題云漢故中常侍長樂太僕特進費亭侯曹

君之碑延禧三年立碑陰又刊詔策二碑文同夾碑東西列對兩石馬高八尺五寸石作粗拙不匹光武隧道所表象馬也有騰兄冢冢東有碑題云漢故潁川太守曹君墓延熹九年卒而不刊樹碑歲月一清按魏志曹引魏書曰仁祖褒潁川太守斯其人也墳北有其元子熾冢冢東有碑題云漢故長水校尉曹君之碑歷太中大夫司馬長史侍中遷長水年三十九卒熹平六年造熾弟允冢冢東有碑題云漢謁者曹君之碑熹平六年立城東有曹太祖舊宅所在負郭對廛側隍臨水魏書曰太祖作議郎告疾歸鄉里築室城外春夏習讀書傳秋冬射獵以自娛

樂文帝以漢中平四年生于此上有青雲如車蓋終日乃解卽是處也後文帝以延康元年幸譙大饗父老立壇于故宅壇前樹碑碑題云大饗之碑碑之東北澗水南有譙定王司馬士會冢冢前有碑晉永嘉三年立碑南二百許步有兩石柱高丈餘半下爲東竹交文作制工巧石牘云晉故使持節散騎常侍都督揚州江州諸軍事安東大將軍譙定王河內溫司馬公墓之神道澗水又東逕朱龜墓北東南流冢南枕道有碑碑題云漢故幽州刺史朱君之碑龜字伯靈光和六年卒官故吏別駕從事史右北平無終年中平二年造碑陰刊故

吏姓名悉薊涿及上谷北平等人

一清按隸釋云漢幽州刺史朱君之碑有

陰在亳州朱君名龜石有碎落不能詳其官闕其可考者嘗以御史中丞督捕益州蠻又為幽州刺史禦鮮卑爾靈帝光和六年卒後漢西南夷傳蜀郡都夷反執太守雍陟遣御史中丞朱龜討之不能尅李顯發板楯蠻平之碑所載與傳合

過水東南逕層邱北邱阜獨秀巍然介立故壁壘所在也過水又東南逕城父縣故城北沙水枝分注之水上承沙水於思善縣世謂之漳水故有漳頭之名也東北流逕城父縣故城西側城東北流入於過水水又東逕下城父北郡國志曰山桑縣有下城父聚者也過水又屈逕其聚東郎山西又東南屈逕郎山南山東有垂惠聚世謂之禮城袁山松郡國志曰山桑縣有

垂惠聚即此城也過水又東南逕過陽城北臨側過水

魏太和中為州治一清按寰宇記云後魏孝文帝置過陽縣州治上疑落過字

改為譙州改譙縣為過陽縣州治上疑落過字以蓋表為刺史後罷州立郡衿

帶塌戍過水又東南逕龍亢縣故城南漢建武十三年

世祖封傅昌為侯國沈氏曰按本傳昌由昆陽徙蕪湖不聞為龍亢也故語曰

沛國龍亢至山桑者也卮林曰闕駟十三州志曰山桑縣人俗貪偽好持馬鞭行邑故

語曰沛國龍亢至山桑詐託旅使若奔喪道過水又屈

遇寇抄遂失資糧酈氏取其一語殊為不備而南流出石梁梁石崩褫夾岸積石高二丈水歷其間

又東南流逕荆山而東流注也

又東南至下邳淮陵縣入於淮

過水又東左合北肥水肥水出山桑縣西北澤藪東南流左右翼佩數源異出同歸蓋微脈涓注耳東南流逕山桑邑南俗謂之北平城昔文欽之封山桑侯疑食邑于此城東南有一碑碑文悉破無驗唯碑背故吏姓名尚存熹平元年義士門生沛國蕭縣劉定興立北肥水又東逕山桑縣故城南俗謂之都亭城非也今城內東側猶有山亭桀立陵阜高峻非洪臺所擬十三州志所謂山生于邑其庭有桑因以氏縣者也郭城東有文穆冢碑三世二千石穆郡戶曹史徵試博士太常丞以明氣候擢拜侍中右中郎將遷九江彭城陳留四郡一清按所

歷止三郡四字疑誤抑或脫失一郡也光和中卒故史涿郡太守彭城呂

虔等立北肥水又東積而為陂謂之瑕陂陂水又東南

逕瑕城南春秋左傳成公十六年楚師還及瑕即此城

也故京相璠曰瑕楚地北肥水又東南逕向縣故城南

地理志曰故向國也世本曰許州向申姜姓也炎帝後

京相璠曰向沛國縣今并屬譙國龍亢也杜預曰龍亢

縣東有向城漢世祖建武十三年更封富波侯王霸為

侯國即此城也俗謂之圓城非又東南逕義城南世謂

之楮城非一清按水經渠水篇云又東南過義成縣西

荆山左合北肥水又東注于淮今鳳陽府懷遠縣東北十五里有渦口城又東北四十五里有向城即過水入

淮之處與漢志合故道元以經言下邳淮陵入淮為非此義城即沛郡之義成縣胡渭云義成故城今名拖城顧祖禹云泗口城今訛為菴城過菴音韵聯而注又有楮城之目始字形之變耳又東入於過

過水又東注淮經言下邳淮陵入淮誤矣

汭水出陰溝于浚儀縣北

陰溝即菴蕩渠也亦言汭受旃然水又云丹沁亂流於

武德絕河南入滎陽合汭故汭兼丹水之稱河涉水斷

汭承旃然而東自王賁灌大梁水出縣南而不逕其北

一清按漢志河南郡滎陽縣卞水馮池皆在西南夏水洪泛則是瀆津通故渠

即陰溝也於大梁北又曰浚水矣故圈稱著陳畱風俗

傳曰浚水逕其北者也又東汭水出焉故經云汭山陰

溝於浚儀縣北也

一清按禹貢雖指曰浮于淮泗達于河蘇氏傳曰自淮泗入河必道于汭

世謂隋煬帝始通汭入泗禹時無此水道以疑禹貢之言按漢書項羽與漢約中分天下割鴻溝以西為漢以

東為楚文穎注云于滎陽下引河東南為鴻溝以通宋鄭陳蔡曹衛與濟汝淮泗會即今官渡是也魏武與袁

紹相持于官渡乃楚漢分界之水皆記入河水道而淮泗安知非禹迹耶禹貢九州之水皆記入河水道而淮泗

獨不能入河帝都所在理不應爾意其必開此道以通之其後或為鴻溝或為官渡或為汭上下百餘里間不

可必然皆引河水而注之淮泗也故王濬伐吳杜預與之書曰足下徑取秣陵自江入淮逾于泗汭沂河而上

振旅還都濟舟師之盛古今絕倫而自泗汭沂河可以班師則汭水之大小當不減于今又足以見秦漢魏晉

皆有此水道非煬帝創開也吳王夫差闕溝通水與晉會于黃池而江始有入淮之道禹時則無之故禹貢曰

沿于江海達于淮泗明非自海入淮則江無入淮之道今直云浮于淮泗達于河不言自海入淮則鴻溝官渡汭水

之類自禹以來有之明矣按蘇氏因說者有謂河當作荷而以爲不必然故發此論閻百詩曰禹貢濟入于河

水經注釋 汲水

南溢而為滎而陶邱而汶而海此禹時之濟瀆發源注海也史記河渠書禹功施乎三代自是之後滎陽下引河東南為鴻溝以通宋鄭陳蔡曹衛與濟汝淮泗會此禹後代于滎澤之北引河東南流故水經謂河水東過滎陽縣蕩蕩渠首受沛東南流者是亦引濟水分流故漢志謂滎陽有蕩蕩渠首受沛東南流者是又自是之後代有疏濬枝津別瀆不可勝數則酈注所謂滎波河濟往復逕通者也雖然其來古矣蘇秦說魏襄王曰大王之地南有鴻溝則戰國前有之晉楚之戰楚軍于邲即汲水則春秋前有之爾雅水自河出為澠離本汲水則爾雅前有之然莫不善于酈道元之言曰大禹塞滎澤滎澤莽莽時方枯豈禹塞之乎又曰昔禹塞其淫水而于滎陽下引河滎陽非禹引而謂禹之時已有乎余是以斷自河渠書參以滎陽下引河不見禹貢之書為出禹之後頗自幸其考訂比蘇氏差詳矣按河渠書有自是之後四字百詩據此判鴻溝非禹迹真老吏斷獄手而愚更有進者謂由泗入荷由荷入濟是矣而自陶邱以西舍鴻溝無達河之道也焉得不指為禹迹乎謂滎陽下引河出禹以後是矣而由濟達河莫知其所經不顯示以一塗終何以被于春之疑乎是當于濟潔之間

求之蓋充青徐揚之貢道皆由濟入潔以達河而宋儒謂濟潔二水無相通之處則浮濟者沂陶邱而西且北勢折其非也誠知經所謂浮于濟者乃至荷會汶之濟而非陶邱滎澤之濟則濟之所以通河者潔也非鴻溝官渡汴水也而紛紜之說不攻自破矣又曰黃文叔云蕩蕩出河斷非禹迹禹之行河本以河濤悍難行平地故釀二渠以引河而載之高地二渠非得已也後世不識聖人之意妄鑿河為瀆或不順地防或附屬不理故其勢易決蓋非獨蕩蕩也其下濮水通河而酸棗決瓠水通河而瓠子決汴渠亦屢決至王景治汴鑿山開澗十里置水門使更相回注紊亂渠脈而禹迹益壞矣且所為通淮泗者以舟楫之利也荷已通矣而何更用通蕩蕩哉其曰禹塞淫水而鑿之者春秋戰國之世商權功利而忽遠圖並植私欲而不顧大經策謀之士託其名于禹而世不之察也河渠書滎陽下引河東南為鴻溝以通宋鄭陳蔡曹衛與濟汝淮泗會其春秋戰國之際明矣偉哉此論善發禹貢之蘊并可以證徐州達于河汲水東逕倉垣城南即大梁縣郡一清按漢志陳留之誤

水經注釋 卷二十三 東潛趙氏定本

大梁續志亦云浚儀本大之倉垣亭也城臨汧水陳留  
 梁是未嘗以大梁名縣也相畢邈治此征東將軍荀晞之西也邈走歸京晞使司  
 馬東萊王讚代據倉垣斷留運漕汧水又東逕陳留縣  
 之鉞鄉亭北陳留風俗傳所謂縣有鉞鄉亭即斯亭也  
 汧水又逕小黄縣故城南神仙傳稱靈壽光扶風人死  
 于江陵胡罔家罔殯埋之後百餘日人有見光于此縣  
 寄書于罔罔發視之唯有履存汧水又東逕鳴雁亭南  
 春秋左傳成公十六年衛侯伐鄭至于鳴雁者也杜預  
 釋地云在雍邱縣西北今俗人尚謂之為白雁亭汧水又  
 東逕雍邱縣故城北逕陽樂城南西征記曰城在汧北

一里周五里雍邱縣界汧水又東有故渠出焉南通雎  
 水謂之董生決或言董氏作亂引水南通雎水故斯水  
 受名焉今無水汧水又東枝津出焉俗名之為洛架口  
 西征記曰洛架水名也續述征記曰在董生決下二里  
 汧水又逕外黃縣南又東逕莠倉城北續述征記曰莠  
 倉城去大游墓二十里又東逕大齊城南陳留風俗傳  
 曰外黃縣有大齊亭又東逕科城北陳留風俗傳曰縣  
 有科稟亭是則科稟亭也汧水又東逕小齊城南汧水  
 又南逕利望亭南風俗傳曰故曰成安也地理志曰陳

留舊名

清按舊名當作縣名

漢武帝以封韓延年為侯國

全氏曰按



小司馬曰表在邾志在陳畱蓋疑未能決也予謂延年邾人則潁川之邾是也以為陳畱非也善長亦據本志言之耳一清按地理志潁川郡本有成安縣分註云侯國也而小司馬以陳畱之成安當之道元則又兩釋之而不知

汧水又東龍門故瀆出焉瀆舊通睢水故西征記曰龍門水名也門北有土臺高三丈餘上方數十步

汧水又東逕濟陽考城縣故城南為菑獲渠考城縣周

之采邑也于春秋為戴國矣左傳隱公十年秋宋衛蔡

伐戴是也漢高帝十一年秋封彭祖為侯國一清按索隱曰漢表

彭祖姓祕音繼韋昭音符籛反非也今檢史記諸本並作祕今見有姓祕氏陳畱風俗傳曰

秦之穀縣也後遭漢兵起邑多災年故改曰菑縣王莽

更名嘉穀一清按道元此說非也漢書傳寬傳畧梁別西擊邾說軍菑南破之師古曰菑縣名也後

為考城則秦時已名菑縣非自漢始章帝東巡過縣詔蓋因王莽更為嘉穀而造作是說

曰陳畱菑縣其名不善高祖鄙柏人之邑世宗休聞喜

而顯獲嘉應亨吉之符嘉皇靈之顧賜越有光烈考武

皇其改菑縣曰考城是瀆蓋因縣以獲名矣汧水又東

逕寧陵縣之沙陽亭北故沙隨國矣春秋左傳成公十

六年秋會于沙隨謀伐鄭也杜預釋地曰在梁國寧陵

縣北沙陽亭是也世以為堂城非也汧水又東逕黃蒿

塢北續述征記曰堂城至黃蒿二十里汧水又東逕斜

城下續述征記曰黃蒿到斜城五里陳畱風俗傳曰考

城縣有斜亭汧水又東逕周塢側續述征記曰斜城東

三里晉義熙中劉公遣周超之自彭城緣汭故溝斬樹穿道七百餘里以開水路停薄于此故茲塢流稱矣汭水又東逕葛城北故葛伯之國也孟子曰葛伯不祀湯問曰何為不祀稱無以供祠祭遺葛伯葛伯又不祀湯又問之曰無以供犧牲湯又遺之又不知祀湯又問之曰無以供粢盛湯使亳衆往為之耕老弱饋食葛伯又率民奪之不授者則殺之湯乃伐葛葛于六國屬魏魏襄王以封公子無忌號信陵君朱氏謀瑋箋云史記云魏而魏安釐王異母弟也昭王薨安釐王即位封公子為信陵君此云襄王誤也其地葛鄉即是城也在寧陵縣西十里汭水又東逕神坑塢又東逕夏

侯長塢

一清按三國志魏武帝紀袁術退保封邱遂圍之未合術走襄邑追到太壽決渠水灌城走寧

陵又追之走九江太壽地無考大約在寧陵襄邑之間又夏侯惇傳領陳留濟陰太守惇乃斷太壽水作陂身自負土率將士勸種稻民賴其利此夏侯長塢蓋以惇得名續述征記曰夏侯塢至

周塢各相距五里汭水又東逕梁國睢陽縣故城北而

東歷襄鄉塢南續述征記曰西去夏侯塢二十里東一

里即襄鄉浮圖也汭水逕其南漢熹平中某君所立死

因葬之其弟刻石樹碑以旌厥德隧前有師子天鹿累

塢作百達柱八所荒蕪頽毀凋落略盡矣

又東至梁郡

一清按漢志秦陽郡高帝五年為梁國續志同作經者乃改云梁郡此與陳縣漢相王君

造四縣碑以淮陽國為淮陽郡蒙縣為睢水餘波南入睢

水逕

卷二十三

東潛趙氏定本

陽城中

汲水又東逕貫城南俗謂之薄城非也闕駟十三州志以爲貫城也在蒙縣西北春秋僖公二年齊侯宋公江黃盟于貫杜預以爲貫也云貫貫字相似貫在齊謂貫澤也是以非此也今于此地更無他城在蒙西北唯是邑耳考文準地貫邑明矣非毫可知一清按毫與薄字同音汲水又東逕蒙縣故城北俗謂之小蒙城也西征記城在汲水南十五六里卽莊周之本邑也爲蒙之漆園吏郭景純所謂漆園有傲吏者也悼惠施之沒杜門于此邑矣汲水自縣南出今無復有水唯睢陽城南側有小水南

流入於睢城南二里有漢太傅掾橋載墓碑載字元賓梁國睢陽人也睢陽公子熹平五年立城東百步有石室刊云漢鴻臚橋仁祠城北五里有石虎石柱而無碑誌不知何時建也汲水又東逕大蒙城北自古不聞有二蒙疑卽蒙毫也所謂景毫爲北毫矣椒舉云商湯有景毫之命者也闕駟曰湯都也毫本帝嚳之墟在禹貢豫州河洛之間今河南偃師城西二十里尸鄉亭是也皇甫謐以爲考之事實學者失之如孟子之言湯居亳與葛爲隣是卽毫與葛比也湯地七十里葛又伯耳封域有限而寧陵去偃師八百里不得童子饋餉而爲之

耕今梁國自有二亳南亳在穀熟北亳在蒙非偃師也  
 古文仲虺之誥曰葛伯仇餉征自葛始卽孟子之言是  
 也崔駰曰湯冢在濟陰薄縣北皇覽曰薄城北郭東三  
 里平地有湯冢冢四方各十步高七尺上平也漢哀  
 帝建平元年大司空史郤長卿按行水災因行湯冢在  
 漢屬扶風今徵之迴渠亭有湯池徵陌是也全氏曰按漢志徵屬  
左馮翊不屬右扶風然不經見難得而詳按秦寧公本紀云二年  
 伐湯三年與亳戰亳王奔戎遂滅湯然則周桓王時自  
 有亳王號湯爲秦所滅乃西戎之國葬于徵者也非殷  
 湯矣劉向言殷湯無葬處爲疑杜預曰梁國蒙縣北有

薄伐城城中有成湯冢其西有箕子冢今城內有故冢  
 方墳疑卽杜元凱之所謂湯冢者也而世謂之王子喬  
 冢冢側有碑題云仙人王子喬碑曰王子喬者蓋上世  
 之真人聞其仙不知興何代也博問道家或言潁川或  
 言產蒙初建此城則有斯邱傳承先民曰王氏墓暨于  
 永和之元年冬十二月當臘之時夜上有哭聲其音甚  
 哀附居者王伯怪之明則登而察焉時天鴻雪下無人  
 徑有大鳥跡在祭祀處左右咸以爲神其後有人著大  
 冠絳單衣杖竹立冢前呼採薪孺子伊永昌曰我王子  
 喬也勿得取吾墳上樹也忽然不見時令太山萬熹楷

故老之言感精瑞之應乃造靈廟以休厥神于是好道之儔自遠方集或絃琴以歌太一或譚思以歷丹田知至德之宅兆實真人之祖先延熹八年秋八月皇帝遣使者奉犧牲致禮祠濯全氏曰隸釋改作祗懼非是之敬肅如也國相東萊王璋字伯儀以為神聖所興必有銘表乃與長史邊乾遂樹之元石紀頌遺烈觀其碑文意似非遠既在經見不能不書存焉

獲水出汲水於梁郡蒙縣北

漢書地理志曰獲水也十三州志曰首受菑獲渠

一清按漢

志梁國蒙縣獲水首受菑獲渠汲水注云汲水又東逕濟陽考城縣故城南為菑獲渠道元是注蓋割裂班志

又雜引闕說以成文始好博之過也亦兼丹水之稱也竹書紀年曰宋殺

其大夫皇瑗于丹水之上又曰宋大水丹水壅不流蓋

汲水之變名也獲水自蒙東出水南有漢故繹幕令匡

碑匡字公輔魯府君之少子也碑字碎落不可尋識竟

不知所立歲月也獲水又東逕長樂固北已氏縣南東

南流逕於蒙澤十三州志曰蒙澤在縣東春秋莊公十

二年宋萬與公爭博殺閔公于斯澤矣獲水又東逕虞

縣故城北古虞國也昔夏少康逃奔有虞為之庖正虞

思于是妻之以二姚者也王莽之陳定亭也城東有漢

司徒盛允墓碑允字伯世梁國虞人也其先奭氏至漢

中葉避孝元皇帝諱改姓曰盛世濟其美以迄于公察  
 孝廉除郎累遷司空司徒延熹中立墓中有石廟廟宇  
 傾頽基構可尋獲水又東南逕空桐澤北澤在虞城東  
 南春秋哀公二十六年冬宋景公遊于空澤辛巳卒于  
 連中大尹左師興空澤之士千甲奉公自空桐入如沃  
 宮者矣獲水又逕龍譙國一清按龍譙國未詳寰宇記  
 亳州下云後漢熹平五年黃  
 龍見譙太史令單颺以為其國當有王者興不及五十  
 年亦當復見後如其言及文帝即位黃初元年以先人  
 舊都立為譙國與長安許昌鄴洛陽號為五都事見後  
 漢書方術傳及三國志魏文帝紀熹平之朝譙尚為縣  
 屬沛國占候者即云其國若豫知當塗  
 受命改制之事史氏多誣此其驗矣 又東合黃水口  
 水上承黃陂下注獲水獲水又東入櫟林世謂之九里

柞獲水又東南逕下邑縣故城北楚考烈王滅魯頃公

亡遷下邑又楚漢彭城之戰呂后弟周全氏曰按項羽  
 本紀云呂后兄

高帝紀亦云呂后兄非弟也且是周  
 呂侯名澤周呂其封國非名周也軍于下邑高祖敗

還從周軍子房肇捐地之策收垓下之師陸機所謂即

謀下邑者也王莽更名下洽矣獲水又東逕碭縣故城

北應劭曰縣有碭山山在東出文石秦立碭郡蓋取山

之名也王莽之節碭縣也山有梁孝王墓其冢斬山作

郭穿石為藏行一里到藏中有數尺水水有大鯉魚黎

萌謂藏有神不敢犯之凡到藏皆潔齋而進不齋者至

藏輒有獸噬其足獸難得見見者云似狗所未詳也山

上有梁孝王祠獲水又東穀水注之水上承碭陂陂中  
 有香城城在四水之中承諸陂散流謂零水滾水清水  
 也積而成潭謂之碭水趙人有琴高者以善鼓琴為康  
 王舍人行彭涓之術浮游碭郡間二百餘年後入碭水  
 中取龍子與弟子期曰皆潔齋待于水傍設屋祠果乘  
 赤鯉魚出入坐祠中碭中有千萬人觀之畱月餘復入  
 水也陂水東注謂之穀水東逕安山北即碭北山也山  
 有陳勝墓觀秦亂首兵伐秦弗終厥謀死葬于碭諡曰  
 隱王也穀水又東北注于獲水獲水又東歷藍田鄉郭  
 又東逕梁國杼秋縣故城南王莽之予秋也獲水又東

歷一清按下有脫文洪溝水注之水南北各一溝溝首對獲世

謂之洪溝非也春秋昭公八年秋薨于紅杜預曰沛國

蕭縣西有紅亭即地理志之朶縣一清按此說亦見晉書地道記而顧景范

非之郡國志泰山郡奉高邑劉昭補註曰左傳昭八年

大蒐于紅紅亭在縣西北漢志沛郡朶縣莽曰貢師古

曰朶亦音貢高后三年封楚元王子富為侯國朱氏謀

音義並異王子侯表景帝三年更封富為紅侯作高后誤一清按

素隱曰楚元王傳休侯富免復封紅侯紅休蓋二鄉名

王莽封劉歆為紅休王莽之所謂貢矣蓋溝名音同非

楚漢所分也全氏曰鴻溝史記年表作洪渠漢書音義

字本通故有指此洪溝為鴻溝者善長特起而糾正之

又東過蕭縣南睢水北流注之

蕭縣南對山世謂之蕭城南山也戴延之謂之同孝山云取漢陽城侯劉德所居里名目山也劉澄之云縣南有冒山未詳孰是也山有箕谷谷水北流注獲世謂之西流水言水上承梧桐陂陂水西流因以為名也余嘗逕蕭邑城右唯是水北注獲更無別水疑即經所謂睢水也城東西及南三面臨側獲水故沛郡治縣亦同居矣城南舊有石橋耗處積石為梁高二丈今荒毀殆盡亦不具誰所造也縣本蕭叔國宋附庸楚滅之春秋宣公十二年楚伐蕭蕭潰申公巫臣曰師人多寒王巡三軍拊而勉之三軍之士皆同挾纊蓋恩使之然矣蕭女

娉齊為頃公之母邵克所謂蕭同叔子也獲水又東歷龍城不知誰所創築也獲水又東逕同孝山北山陰有楚元王冢上圓下方累石為之高十餘丈廣百許步經十餘墳悉結石也獲水又東淨淨溝水注之水上結梧桐陂西北流即劉中書澄之所謂白溝水也又北入於獲俗名之曰淨淨溝也

又東至彭城縣北東入於泗

獲水自淨淨溝東逕阿育王寺北或言楚王英所造非所詳也蓋遵育王之遺法因以名焉與安陂水合水上承安陂餘波北逕阿育王寺側水上有梁謂之元注橋




水傍有石墓宿經開發石作工奇殊爲壯構而不知誰  
冢疑卽澄之所謂凌冢也水北流注於獲獲水又東逕  
彌黎城北劉澄之永初記所謂城之西南有彌黎城者  
也獲水於彭城西南廻而北流逕彭城城西北舊有楚  
大夫龔勝宅卽楚老父哭勝處也獲水又東轉逕城北  
而東注泗水北三里有石冢被開傳言楚元王之孫劉  
向冢未詳是否城卽殷大夫老彭之國也于春秋爲宋  
地楚伐宋并之以封魚石崔子季珪述初賦曰想黃公  
于邳圯勤魚石于彭城卽是縣也孟康曰舊名江陵爲  
南楚陳爲東楚彭城爲西楚文穎曰彭城故東楚也項

羽都焉謂之西楚漢祖定天下以爲楚郡封弟交爲楚  
王都之宣帝地節元年更爲彭城郡王莽更之曰和樂郡  
也徐州治城內有漢司徒袁安魏中郎將徐庶等數碑  
並列植于街石咸曾爲楚相也大城之內有金城東北  
小城劉公更開廣之皆壘石高四丈列塹環之小城西  
又有一城是大司馬琅邪王所修因項羽故臺經始卽  
構宮觀門閣惟新厥制義熙十二年霖雨驟澍汴水暴  
長城遂崩壞冠軍將軍彭城劉公之子也登更築之悉  
以博壘宏壯堅峻樓櫓赫奕南北所無宋平北將軍徐  
州刺史河東薛安都舉城歸魏魏遣博陵公尉苟仁城

陽公孔伯恭援之邑閣如初觀不異昔自後毀撤一時  
 俱盡一清按此處疑有脫文魏書堯暄傳初暄使徐州見州城樓觀嫌其華盛乃令往往毀撤由是更損落及高祖幸彭城聞之曰暄猶可追斬間遺工雕鏤尚存龍雲逞勢奇為  
 精妙矣城之東北角起層樓于其上號曰彭祖樓地理  
 志曰彭城縣古彭祖國也世本曰陸終之子其三曰篋  
 是為彭祖彭祖城是也下曰彭祖冢彭祖長年八百綿  
 壽永世于此有冢蓋亦元極之化矣其樓之側衿汲帶  
 泗東北為二水之會也聳望川原極目清野斯為佳處  
 矣

水經注釋卷二十三終



文政

